

四庫全書

史部

欽定四庫全書

通典卷五十三

唐 京兆杜佑 君卿纂

禮十三 古十二

大學

虞夏

東晉 宋

齊 周

後魏 漢

後漢 魏

隋 大

唐 晉

有虞氏大學為上庠小學為下庠

大學篇曰古之欲明
明德於天下者先治

其國欲治其國者先齊其家欲齊其家者先修其身欲
修其身者先正其心尊師敬長而大學之道著焉學記
曰君子如欲化民成俗其必由學乎玉不琢不成器人
不學不知道是故古之王者建國君民教學為先魏文

侯孝經傳曰大學中學也庠言養也所以養雋德也舜命夔曰汝典樂以教胄子胄子國子也○夏后

氏大學為東序小學為西序

次序先王之道而學之

○殷制大學

為右學小學為左學又曰瞽宗

王制曰小學在公宮南之左大學在郊鄭玄云

學所以學士之宮也尚書傳曰百里之國二十里之郊七十里之國九里之郊五十里之國三里之郊宗尊也

瞽無目之名以喻童蒙又云瞽瞍之所宗也

○周制大學為東膠小學為虞

庠

膠之言糾也所以糾收學士也鄭注祭義云周有四郊之虞庠也以小學為虞庠之制

又云天

子曰辟雍

辟明也雍和也以明和為名化道天下之人使之成士或又云辟者圓壁也雍之以水而

圓象天於陽德之施行周流無極使學者進德而不已亦所以明和政教之至崔靈恩云學制有二一云制與

明堂同體五室四堂在一基之上四方堂則以其方名
學中央堂謂之太學二云凡立學之法有四郊及國中
在東郊曰東學並方名之在國中謂之
大學故鄭注祭義曰周有四郊之虞庠王太子王子羣

后之太子卿大夫元士之適子國之俊選皆造焉

王之子

庶子也羣后
公及諸侯

樂正崇四術立四教

樂正樂官之長掌國
子之教幼者教之於

小學長者教之於大學尚書傳曰
年十五始入小學十八始入大學

春秋教以禮樂冬夏

教以詩書

春夏陽也詩樂者聲聲亦陽也
秋冬陰也書禮者事事亦陰也

師氏掌以嫗

詔王

馬融曰嫗嫗道也告王以善道師
者教人以事而諭諸德也嫗音義

以三德教國子

一曰至德以為道本

馬融曰德行內外之稱在心為德
施之為行至德者中德也中庸曰

天命之謂性率性之謂道失中庸則無以至道故曰以
為道本鄭玄曰至德中和之德覆幬持載含容者也

二曰敏德以為行本

敏德仁義順時者也

三曰孝德以知逆惡

馬融

曰教以孝德使知逆惡之不可為也鄭玄曰孝德尊祖愛親所以守其生也

教三行一曰孝

行以親父母

善事父母之行盡其愛敬

二曰友行以尊賢良

馬融曰教以朋

友之行使擇益友

三曰順行以事師長

馬融曰師德所不如也長老者

凡國之

貴游子弟學焉

王公之子弟游無官司者也

凡學必時春夏學干戈

秋冬學羽籥皆於東序

干盾也戈劒也干戈萬舞象舞也用動作之時學之羽籥

籥舞象文用安靜之時學之詩云左手執籥右手秉翟

春誦夏絃太師詔之瞽宗

秋學禮執禮者詔之冬讀書典書者詔之禮在瞽宗書

在上庠

周立三代之學學書於有虞氏之學典謨之教所興也學舞於夏后氏之學文武備也學禮樂

於殷之學功成治定與已同也誦謂歌樂也絃謂以絲播詩陽用事則學之以聲陰用事則學之以事者也

大學之禮雖詔於天子無北面所以尊師也

尊師重道焉不使處

臣位也武王踐祚召師尚父而問焉曰昔黃帝顓頊之道存乎意亦忽不可得見與師尚父曰在丹書王欲聞之則齊矣王齊三日端冕師尚父亦端冕奉書而入負屏而立王下堂南面而立師尚父曰先王之道不北面王行西折而南東面而立師尚父西面道書之言大戴禮保傳篇曰帝入東學尚親而貴仁則親疎有序而恩相及矣入西學尚賢而貴德則聖智在位而功不墮矣入南學尚齒而貴信則長幼有差而人不誣矣入北學尚貴而尊爵則貴賤

有等而下不踰矣入大學承師而問道退習而端於太傅則德智長而理道得矣

大學之教也

時教必有正業

業必先王經典

古之教者家有塾黨有庠術有

序國有學

術當為遂古者仕焉而已者歸教於閭里朝夕坐於門側之堂謂之塾周禮五百家為黨

萬二千五百家為遂黨屬於鄉遂在遠郊之外

比年入學中年考校

中間也間歲則考學

者之德行三歲大比乃考焉

一年視離經辨志三年視敬業樂羣五

年視博習親師七年視論學取友謂之小成九年知類

通達強立而不反謂之大成夫然後足以化民易俗近

者說

音悅

服而遠者懷之此大學之道也王制耆老皆朝

於庠元日習射上功習鄉上齒大司徒帥國之俊士與

執事焉

將習禮使之觀焉此庠謂鄉學

又修六禮以節民性明七教以

興民德齊八政以防民淫一道德以同俗養耆老以致

孝恤孤獨以逮不足上賢以崇德簡不肖以絀惡

司徒地官

卿掌邦教者

命鄉簡不帥教者以告於王王命三公九卿大

夫元士皆入學不變王親視學

亦謂使習禮以化之也不變王又親臨視重桑

賢者之子孫也此習禮皆於大學也

不變命國之右鄉簡不帥教者移之

左命國之左鄉簡不帥教者移之右如初禮

中年考校而又不變

轉徙其居覲其見
新人有所化也

不變移之郊

郊鄉界之外也稍出遠之

不變移之

遂

遂郊外也大夫掌使習禮也

不變屏之遠方終身不齒

遠方九州之外也頃

秦始皇焚書坑儒大學從此缺矣

○漢高帝以叔孫通為奉常諸弟子

共定禮儀者咸為選首其後亦未遑庠序之事至孝文

時頗登用

言少用文學之士也

然帝本好刑名之言及孝景不任

儒學竇太后又好黃老術故諸博士具官待問未有進

者

具官謂備員而已

武帝立後竇太后崩田蚡為丞相黜黃老

刑名百家之言延儒者百數

自漢興言易有淄川田生言書有濟南伏生言詩於

曾則中培公於齊則轅固生燕則韓太傅嬰言禮則魯高堂生言春秋於齊則胡毋生於趙則董仲舒而公孫弘為丞相封侯天下靡然向風矣培音陪制曰蓋聞導人以禮風之以樂今

禮廢樂崩朕甚愍焉故詳延天下方聞之士咸登諸朝

詳悉也方道也有道及博聞之士也其令禮官勸學講議洽聞舉遺興禮

以為天下先舉遺謂經典遺逸者求而舉之太常議曰聞三代之道鄉

里有教勸學興禮崇化厲賢以風四方太平之原也因

舊博士置弟子五十人太常擇年十八以上儀狀端正

者補博士弟子事具選舉中自景帝時文翁為蜀郡守設學校選張叔等十餘人入京就學

既成就乃遣張叔分教蜀中子弟自是蜀之學者比於齊魯焉昭帝舉賢良文學增博

士弟子員數滿百人至成帝時劉向請興辟雍設庠序

帝下公卿議會向病卒成帝末增弟子員三千人歲餘

如故及王莽為宰衡欲耀衆庶遂興辟雍增元士之子

得受業如弟子甲乙之科具選舉中○後漢質帝本初元年

詔大將軍以下至六百石悉遣子弟就學每春秋輒於

鄉射月一會有勸勉進用之端於是遊學者增至三萬

餘生自本初後二十四年高生皓首見拔者少桓帝建

和初詔諸學生課試補官

具選舉篇

元嘉二年詔曰書生汝

南胡憲陳留恭幸爽或六十以下常以月朔會辟雍垂

白安貧童子潁川王通通經拜太子舍人因試憲等補

郎舍人後皆限六十以上七十以下年有增減不應得

試

易凡天地之數五十有五此所以成變化令五十在試科是應天地之數也

永壽二年復

課試諸生補郎舍人

具選舉篇

獻帝建安中侍中鮑衡奏按

王制立大學小學自王太子以下皆教以詩書而升之

司馬謂之賢者任之以官故能致刑措之盛立太平之

化也今學博士並設表章而無所教授兵戎未戢人並在公而學者少可聽公卿二千石六百石子弟在家及將校子弟見為郎舍人皆可聽詣博士受業其高才秀

達學通一藝太常為作品式從之

晉摯虞決疑云漢初置博士而無弟子後

置弟子五十人與博士俱共習肄禮儀又增滿五百人漢末至數千人

○魏文帝黃初五

年立大學於洛陽時慕學者始詣大學為門人滿二歲試通一經者稱弟子不通一經罷遣弟子滿二歲試通二經者補文學掌故不通經者聽須後輩試試通二經

亦得補掌故掌故滿二歲試通三經者擢高第為太子舍人不第者隨後輩復試試通亦為太子舍人舍人滿二歲試通四經者擢其高第為郎中不通者隨後輩復試試通亦為郎中郎中滿二歲能通五經者擢高第隨才叙用不通者隨後輩復試試通亦叙用

齊王正始中劉馥上疏簡

高門子孫為生曰黃初以來崇立大學二十餘年而成者蓋寡由博士選輕諸生避役高門子孫耻非其倫故學者雖有其名而無其實雖設其教而無其功宜高選博士取行為人表經任人師者掌教國子依遵古法使二千石以上子孫年從十五皆入大學明制黜陟陳榮辱之路不從吳孫休永壽元年立學制曰古者建國教

學為先所以遵理為時養器也宜按舊制置學宮立五經博士覈取應選加其寵祿見吏之中及將吏子弟有志好者各令就業一歲課試差其品第加以位賞使見之者樂其榮聞之者羨其稱以淳王化以正風俗未行也

○晉武帝初大學生三千人太始八年有司奏大學

生七千餘人才任四品聽留詔曰已試經者留之大臣

子弟堪受教者令入學其餘遣還郡國咸寧二年起國

子學

法周禮國之貴游子弟國子受教於師者也

惠帝元康三年以人多猥

雜欲辨其涇渭於是制立學官第五品以上得入國學

○東晉元帝時太常賀循上言尚書被符經置博士一

人又多故歷紀儒道荒廢學者能兼明經義者少且春秋三傳俱出聖人而義歸不同自前代通儒未有能通得失兼而學之者也況今學義甚難不可令一人總之今宜周禮儀禮二經置博士二人春秋三傳置博士三人其餘則經置一人合八人太常車胤上言按二漢舊事博士之職唯舉明經之士遷轉各以本資初無定班魏及中朝多以侍中常侍儒學最優者領之職雖不同漢氏盡於儒士取用其揆一也今博士八人愚謂宜依

魏氏故事擇朝臣一人經學最優者不繫位之高下常以領之每舉太常共研厥中其餘七人自依常銓選太興初欲脩立學校唯周易王氏尚書鄭氏古文孔氏毛詩周官禮記論語孝經鄭氏春秋左傳杜氏服氏各置博士一人其儀禮公羊穀梁及鄭易皆省不置博士

太常

荀崧上疏曰昔武皇帝崇儒術以賈馬鄭杜服孔王何之徒章句傳注衆家之學置博士十九人二十州之中師徒相傳學士如林猶選張華劉寔居太常之官以重儒教伏聞節省之制皆三分置二博士舊員十有九人今五經合九人准古計今猶未中半九人已外猶宜增置周易有鄭氏注其書根源誠可深惜儀禮所謂曲禮

也鄭玄於禮特明皆有證據昔周之衰孔子作春秋左丘明子夏造滕親受孔子沒丘明撰其所聞為之傳微辭妙旨無不精究公羊高親受子夏立於漢朝多可採用穀梁赤師徒相傳諸所發明或是左氏公羊不載亦足有所訂正臣以為宜各置一人以傳其學遇王敦難不行

孝武帝太元初於中堂

立行大學於時無復國子生置大學生六十人國子生

權銓大臣子孫六十人事訖罷

其國子生見祭酒博士單衣角巾執經一卷以

代手板

自穆帝至孝武並以中堂為大學太元九年尚書

謝石請興復國學以訓胄子頒下州郡普修鄉校帝納其言明年選公卿二千石子弟生增造廟房屋百五十

五間而品課無章君子耻與其列國子祭酒殷茂上言
臣聞舊制國學生皆取冠族華胄比列皇儲而中混雜
蘭艾遂令人情耻之詔雖褒納竟不施行○宋武帝詔
有司立學未就而崩文帝元嘉二十年立國學二十七
年廢明帝太始中初置總明觀祭酒一人有玄儒文史
四科科置學士十人○齊高帝建和四年詔立國學置學
生五十人取王公以下子孫年十五以上二十以下家
去都二千里為限帝崩乃以國諱廢武帝永明三年詔

立學乃省聰明觀呂公卿以下子弟置生二百二十人

其年秋中悉集東昏侯永元初詔依永明舊事廢學時

有司奏國學大學兩存焉

領國子監助教曹思文上表曰古之建國君人者必教學

為先將以節其邪情化人成俗今制書既下而廢學先聞將恐觀國之光有以闕也若以國諱宜廢昔漢武立學爰泊元始百餘年中未嘗暫廢其間豈無國諱矣永明以德太子故廢斯非古典尋國之有學本以興化致禮故記云天子出征受命於祖受成於學今之國學即古之大學天子入國學以行禮也太子入國學以齒讓也大學之與國學斯是晉代殊其士庶異其貴賤耳然貴賤士庶皆須教國學大學兩存之可也時立學太尉王儉復依晉代國子生單衣角巾執經代手板也

○後魏道武帝初定中原始

於平城立大學置五經博士生員千餘人天興二年春增國子大學生員三千人太武始光三年別起大學於城東後徵盧玄高允等令州郡各舉才學於是人多砥厲儒術轉興獻文帝天安初立鄉學郡置博士二人助教二人學生六十人後令大郡立博士二人助教四人學生百人次郡立博士二人助教四人學生八十人中郡博士一人助教二人學生六十人下郡立博士一人助教一人學生四十人郡縣學始乎此矣孝文太和中

改中書為國子又開皇子之學及遷都洛邑立國子大學四門小學○隋文帝開皇中國子寺不隸太常自前代皆屬太常也○大唐武德元年詔皇族子孫及功臣子弟於秘書外省別立小學七年詔諸州縣及鄉並令置學有明一經以上者有司試策加階敘貞觀五年太宗數幸國學遂增築學舍千二百間國學太學四門亦增生員其書算各置博士凡三千二百六十員其屯營飛騎亦給博士授以經業無何高麗百濟新羅高昌吐

蕃諸國酋長亦遣子弟請入國學之內八千餘人國學之盛近古未有龍朔二年東都置國子監丞主簿錄事

各一員四門博士助教四門生三百員俊士二百員置

弘文館於上臺生徒三十人置崇文館於東宮生徒二

十人

皆以皇族總麻以上親皇太后皇后大功以上親散官一品中書門下平章事六尚書功臣身食實

封者京官職事正三品供奉官三品子孫京官職事從三品中書黃門侍郎子孫為之並尚書省補

西京

國子監領六學

生徒皆隸尚書省補

一曰國子學生徒三百人

分習

五經一經六十人以文武官三品以上及國公子孫從二品以上之曾孫為之二曰大學生徒

五百人

每一經百人以四品五品及郡縣公子孫及從三品之曾孫為之

三曰四門學

生徒千三百人

分經之制與大學同其五百人以六品七品及侯伯子男之子為之其八百人

以庶人之俊造者為之

四曰律學生徒五十人

取年十八以上二十以下以八品

九品子孫及庶人之習法令者為之

五曰書學生徒三十人

以習文字者為之

六

曰算學生徒三十人

以習計數者為之

凡二千二百一十人州

縣生徒有差

州縣學生門蔭與律書算學同諸生皆限年十四以上十九以下皆郡縣自補京都

八十員大都督中都督府上郡各六十員下都督府中郡各五十員下郡四十員京縣五十員上縣四十員中

縣三十員下縣二十員也

凡諸學皆有博士助教授其經義每歲仲

冬郡縣館監課試其成者長吏會屬僚設鄉飲之禮開
元七年十月皇太子詣國學行齒胄禮二十六年正月
赦文古者鄉有序黨有塾將以弘長儒教誘進學徒化
人成俗率由於是其天下州縣每一鄉之內里別各置
一學仍擇師資令其教授又勅諸州鄉貢見訖令就國
子監謁先師學官為之開講所司設食弘文崇文館學
生及監內學生亦許聽焉天寶初明經進士習爾雅九
載國子監置廣文館知進士業博士助教各一人十二

載七月舉人不得充鄉貢皆補學生四門俊士停之永
泰二年正月國子祭酒蕭昕上言請崇儒學以正風教
勅曰頃以戎狄多虞急於經畧大學空設諸生蓋寡絃
誦之地寂寥無聲函丈之間殆將不掃上序及此甚用
憫焉其諸道節度觀察都督防禦使等朕之腹心久鎮
方面眷其子弟各奉義方并宰相朝官及神策六軍子
弟欲習業者自今以後並令補國子學生欲其業重羸
金器成琢玉日新厥德代不乏賢其中身雖有官欲附

學讀書者聽其學官委中書門下即簡擇行業堪為師範者充學生員數多少所習經業考試等第并所供糧料及脩理間各委本司作事件聞奏

諸侯立學

周

後漢

東晉

周制諸侯學曰類宮

類之言班所以班政教五經通義云泮水者泮之言半也天子曰辟

雍謂以土雍水外員如壁故曰辟雍義取四方來觀者平均耳泮宮水雍其半蓋東西門以南通水北無水也

類音

王制天子命之教然後為學

崔靈恩云諸侯為學之法但一堂之上不

為五室唯南向為之置立之處一如時王之法貴尚是同然則周之諸侯大學東膠在王宮之左小學虞庠在

西郊所以知一如時王之法者鄭玄注王制小學在公宮南之左大學在郊云殷諸侯置學之處得同天子

魯立三代之學米廩有虞氏之庠也序夏后氏之序也

瞽宗殷學也

庠序亦學也庠之言詳也於以考禮詳事也魯謂之米廩虞帝上庠今藏菜盛之委

焉序次王事也瞽宗樂師瞽矇之所宗也古者有道有德者教焉死則以為樂祖於此祭之也崔靈恩云凡諸

侯之子入學之法亦以十年而出就外傳學書計入學之時祭先聖先師釋奠一如王子之法○後漢

建安末魏國作類宮於鄴城南○東晉穆帝永和○中征

西將軍庾亮在武昌開置學官起立講舍亮家子弟及

叅佐大將子弟悉令入學四府博學識義通涉文學經

論者建儒林祭酒班同三署厚其供給皆妙選邦彥必有其寔者以充此舉近臨川臨賀二郡並求修復學校若非束修之流禮教所不及而欲階緣免役者不得為

生明為條制令法清而人貴

教曰人情重交而忽財好逸而惡勞學業致苦而錄

答未厚由捷徑者多故莫肯用心洙泗邈遠風雅彌替後生放縱不復憲章典謨臨官宰政者務目前之理遂令詩書荒廢頌聲寂寥昔魯秉周禮齊不敢侮范會崇典晉國以理楚頌魏之君皆阻帶山河而不能保禮義之固孰與金城湯池哉今江表晏然王道日崇三時既務五教並修軍旅已整俎豆無廢庸非善哉使處分安學校處所又繕造禮器將行大射之禮亮死尋廢

釋奠

周

隋 魏

大 唐

東 晉

宋

齊

梁

北 齊

周制凡始立學必釋奠於先聖先師及行事必以幣

謂天

子命之教始立學官者也先聖若周公孔子

凡釋奠者必有合也

國無先聖先師則所

釋奠者當與鄰國合也

有國故則不

故謂國有可為先聖先師者若唐虞有夔伯夷周有周公

魯有孔子各自奠之不合之也

凡學春官釋奠於先師秋冬亦如之謂官

詩書禮樂之官也周禮凡有道者有德者使教焉死則以為樂祖祭瞽宗此之謂先師之類不言夏從春可知

釋奠者設薦饌酌而已無迎尸以下之事

始立學者既饗器用幣

禮樂之器成則饗之

又用幣告先聖先師以器成也

然後釋菜

告先聖先師以器成乃時將用也學記曰大學始教皮弁

欽定四庫全書

卷五十三

祭菜示敬道也鄭玄曰禮先聖先師也菜芹藻之屬也

不舞不授器

釋菜禮輕也釋奠則舞舞

則授器司馬之屬司兵司戈司盾祭祀授舞者兵也

乃退儐於東序一獻無介語

可也

言乃退者謂得立三代之學者釋菜於虞庠則儐賓於東序也魯之學有米廩東序瞽宗也

天

子視學大昕鼓徵所以警衆也

早昧燕擊鼓以召庶也警猶起也凡用樂大胥

以鼓徵舉士

衆至然後天子至乃命有司行事興秩節祭先

師先聖焉

興猶舉也秩常也節猶禮也使有司攝其事舉常禮焉祭先師先聖不親祭之者視學觀

禮耳非為彼報也

有司卒事反命

告祭畢也祭畢天子乃入

將出征受命於

祖告祖也

受成於學

定兵謀也

出征執有罪反釋奠於學以訊

馘告

釋菜奠幣禮先師也訊馘所生獲斲耳者詩云執訊獲醜又曰在類獻馘馘或為國

○魏齊

王正始中每講經徧輒使太常釋奠於辟雍以大牢祠

孔子以顏回配○晉武帝太始七年惠帝元康三年二

釋奠皆於大學太始六年元康五年二行鄉事皆於辟

雍

鄉事鄉飲酒禮也

惠帝之為太子及愍懷太子講經竟並親

釋奠於大學○東晉明帝之為太子亦行釋奠禮成穆

孝武三帝皆親釋奠惟成帝在辟雍自是一時制也孝

武以大學在水南懸遠有司議依穆帝升平元年於中

堂權立行大學釋奠禮畢會百官六品以上

時無國子生有司奏

應須二學生百二十人大學生取見人六十國子生權銓大臣子孫六十人事訖罷也

○宋文帝

元嘉二十二年太子釋奠採晉故事

裴松之議應舞六佾宜設軒懸之樂

牲牢器用悉依上公

祭畢親臨學宴會太子以上悉在○齊武帝

永明三年有司奏宋元嘉舊事學生到先釋奠先聖先

師禮又有釋菜未詳今當行何禮用何樂及禮器時從

喻希議用元嘉故事設軒懸之樂六佾之舞牲牢器用

悉依上公

尚書令王儉議周禮春入學釋菜合舞記云始敬皮弁祭菜示敬道也又云始入學必釋

奠先聖先師中朝以來釋菜禮廢金石俎豆皆無明文
方之七廟則輕比之五祀則重陸納車屑謂宣丘廟宜
依亭侯之爵范甯欲依周公之廟用王者儀范宣謂當
其為師則不臣之釋奠日宜備帝王禮樂此則車陸失
於過輕二范傷於太重喻布云若王者自設禮樂則肆
賞於致敬之所若欲嘉美先師則須所況非備細尋此
說守附情理皇朝屈尊弘教惟以師資引同○梁武帝
上公即事惟允元嘉裴松之議故事可依也

天監八年皇太子釋奠周捨議既惟大禮請依東宮元

會太子著絳紗襪

音博衣領也

樂用軒懸合升殿坐者皆服

朱衣帝從之又有司以為禮云凡為人子者升降不由

阼階吏部郎徐勉議鄭玄云由命士以上父子異宮宮

室即異無不由阼階之禮請釋奠及宴會太子升堂並
宜由東階若舉駕幸學自然中階其會賓客依舊西階
大同七年皇太子表其子寧國臨城公入學時議者以
與太子有齒胄之議疑之僕射臣纘等以為參點回路
並事宣父鄒魯稱盛洙汶無議師道既光得以資敬無
虧亞二制可○北齊將講於天子講畢以一大牢釋奠
孔宣父配以顏回列軒懸樂六佾舞皇太子每通一經
及新立學必釋奠禮先聖先師每歲春秋二仲常行其

禮每月朔制祭酒領博士以下及國子諸學生以上大

學四門博士升堂助教以下大學諸生階下拜孔聖揖

顏回日出行事其郡學則於坊內立孔顏廟博士以下

亦每月朝

張憑議曰不拜顏子者按學堂舊有聖賢之像既備禮盡敬奉尼父以為師而未詳顏子

拜揖之儀臣以聖者君道也師者賢臣道也若乃推舜禹於君位則稷契與我並為臣矣師玄風於洙泗則顏

子吾同門也夫大賢恭己既揖讓於君德回也如愚豈越分於人師哉是以王聖佐賢而君臣之義著拜孔揖

顏而師資之分同矣

○隋制國子寺每歲四仲月上丁釋奠於先

聖先師年別一行鄉飲酒禮

州縣學則以春秋仲月釋奠亦每年於學一行鄉飲

禮酒

○大唐武德二年於國子學立周公孔子廟各一所

四時致祭

貞觀二十一年制左丘明以下二十二人同享

初以儒官自為祭主

直云博士姓名昭告於先聖又州縣釋奠亦博士為主

許敬宗奏曰秦漢釋奠無文魏氏則太常行事自晉宋

以降時有親行而學官為主全無典實在於臣下理不

合專今請國學釋奠令國子祭酒為初獻祝詞稱皇帝謹

遣仍令司業為亞獻博士為終獻其州學刺史為初獻

上佐為亞獻博士為終獻縣學令為初獻丞為亞獻主

簿及尉通為終獻修附禮令以為永制七年二月高祖
幸國子學親臨釋奠引道士沙門與博士雜相駁難久
之貞觀十四年二月太宗幸國子學觀釋奠永隆二年
二月皇太子親行釋奠之禮開耀元年二月皇太子釋
奠於國學景雲二年皇太子將親釋奠於國學有司草
儀注令從臣皆乘馬著衣冠太子左庶子劉子玄進議
曰古者自大夫以上皆乘車而以馬為駢服魏晉以降
迄於隋氏朝士又駕牛車至如李廣北征解鞍憩息馬

援南伐據鞍顧盼斯則鞍馬之設行於軍旅戎服所乘
貴於便習者也按江左官至尚書郎而輒輕乘馬則為
御史所彈又顏延年罷官後好騎馬出入閭里當時稱
其放誕此則專車憑軾可擐朝衣單馬御鞍宜從褻服
求之近古灼然之明驗也褒衣博帶方履高冠本非馬
上所施自是車中衣服且長裙廣袖襜如翼如鳴佩紆
組鏘鏘奕奕馳驟於風塵之內出入於旌榮之間儻馬
有驚逸人從顛墜遂使屬車之右遺屨不收清道之傍

絳驂相續因以受嗤行路有損威儀其乘馬衣冠竊謂
宜從廢改皇子令附外宣行仍編入令以為常式開元
十一年詔春秋釋奠用牲牢其屬縣用酒脯而已二十
七年八月因釋奠文宣王始用宮懸之樂二十八年二
月勅文宣王廟春秋釋奠宜令攝三公行禮著之常式
國子祭酒劉援奏准故事釋奠之日羣官道俗等皆合
赴監觀禮請依故事著之常式制可之其儀具開元禮

祀先代帝王

名臣附
後魏

隋

漢

後漢
大唐

魏

東晉

漢武帝時有人言古者天子以春解祠祠黃帝用一梟

破鏡

張晏曰黃帝五帝之首也春歲之始也梟惡逆之鳥方士虛誕云以歲始祓除凶災令神仙之帝食

惡逆之物使天下為逆者破滅梟名食母破鏡名食父如羆首而武眼黃帝欲絕其類使百司皆用焉漢使東郡送梟五月五日作羹以賜百官解祠者解罪求福也

○後漢章帝元和春東巡

狩使使者奉一大牢祠帝堯於濟陰○魏武帝少時漢

太尉橋玄獨先禮異焉故建安中遣使祠以大牢

蜀主劉禪

景曜六年詔為丞相諸葛亮立廟於沔陽先是所在各請立廟不許百姓遂私祭之或以為可立於京師禪皆不納步兵校尉習崇中書侍郎向亮等言於禪曰自漢以來小德而圖形立廟者多矣况亮德範遐邇勲蓋季

世而烝嘗止於私門廟貌闕而莫立非所以存德念功
遠追在昔也今若盡從人心則黷而無典建之京師又
逼宗廟宜因近其墓立之於沔陽使所屬以時賜祭凡
其臣故欲奉祠者皆限至廟斷其私祀於是從之何承
天駁之曰周禮凡有功者祭於大烝故後代遵之
元勲配饗克等曾不是式禪又從之蓋非禮也 ○東

晉孝武帝寧康三年七月故事禮臯陶於廷尉寺新禮

移祀於律署以同祭先聖於大學舊祀以社日新改用

孟秋以應秋政

摯虞按虞書臯陶作士惟明克允國重其功人思其當是以獄官禮其神繫者

致其祭功在斷獄之成不在律令之始也大學之祀義
同太常故祭於大學律之署卑於廷尉移祀於署是去
重而就輕非正署廢興無常宜如舊祀於廷尉祭用仲
春義取重生改用孟秋以應刑殺理未足以相易宜定

新禮皆如舊制

○後魏文成帝東巡歷橋山祀黃帝孝文太和十六年詔曰法施於人祀有明典立功垂惠祭有常式其孟春應祀者頃以事殷遂及今日可令以仲月而饗祀焉凡在祀令者有五帝堯樹則天之功興巍巍之治可祀於平陽虞舜播太平之風致無為之化可祭於廣寧夏禹禦洪水之災建天下之利可祀於安邑周文公制禮作樂垂範萬葉可祀於洛陽其宣尼廟已於中省別勅有司行事自文公以上可令當界牧守各隨所近

攝行祀事皆用清酌尹祭也

曲禮曰脯曰尹祭

○隋制使祀先

代王公帝堯於平陽以契配帝舜於河東咎繇配夏禹
於安邑伯益配商湯於汾陰伊尹配文王武王於澧渭
之郊周公召公配漢帝於長安蕭何配各以一太牢而
無樂配者饗於廟庭○大唐前修禮令無祭先代帝王
之文禮部尚書許敬宗等奏謹按禮記祭法云聖王之
制祭祀也法施於人以死勤事以勞定國能禦大災能
捍大患則祀之其漢高祖祭法無文但以前代迄今多

行秦漢故事始皇無道所以棄之漢祖典章法垂於後
自隋以上亦在祠例今請聿遵故實三年一祭以仲春
之月天寶六載正月制三皇置一廟五帝置一廟有司
以時祭饗至七載五月詔三皇以前帝王宜於京城內
共置一廟仍與三皇五帝廟相近以時致祭天皇氏地
皇氏人皇氏有巢氏燧人氏其祭料及樂請准三皇五
帝廟以春秋二時饗祭歷代帝王肇跡之處未有祠宇
者所在郡置一廟饗祭仍取當時將相德業可稱者二

人配饗

老君祠

先賢附

後漢

大唐

後漢桓帝延熹八年使中常侍之陳國苦縣祠老子九年親祠老子於濯龍中文廟為壇飾純金釭器設華蓋座用郊天樂○大唐乾封元年追號老君為太上元元皇帝文明元年九月冊元元皇帝妻為先天太后立尊像於老君廟所開元二年三月親祠元元皇帝廟追尊元元皇帝父周上御史大夫復追尊為先天太皇仍於

譙郡置廟歲餘一祀以上准先天太后廟例二十九年

兩京及諸州各置廟一所并置崇元館天寶元年親祠

元元廟又於古今人表昇元元皇帝為上聖

其時同制莊子號南

華真人文子號通元真人列子號冲虛真人庚子號洞靈真人又以其所著之書並為經

其年九

月改兩京元元廟為太上元元皇帝宮

其告饗所奏樂降神用混成之

樂送神用太乙之樂

二載西京改為太清宮東京改為太微宮天

下諸郡為紫極宮三月勅古之制禮祭用質明義兼取

於尚幽情實緣於既沒我聖祖湛然常在為道之宗既

殊有盡之期須展事生之禮自今以後每聖祖宮有昭告宜改用卯時以前行禮四載四月勅比太清宮行事官皆冕服爰及奏樂未易舊名并告獻之時仍陳冊祝既非事生之禮皆從降神之儀且真俗殊倫幽明異數理有非便亦在從宜自今以後每太清宮行禮官宜改用朝服兼停祝版改為清詞於紙上其告獻辭及所奏之樂章朕當別自修撰仍令所司具儀注聞奏十三載正月詔令有司每至孟月則修薦獻上香之禮仍為常

式

六載五月詔後漢張天師冊贈太師梁貞白陶先生冊贈太保

興元元年十二月詔

太清宮改太常卿亞上香光祿卿終上香改三禮拜為

再拜貞元元年正月勅薦饗太清宮亞獻太常卿充終

獻光祿卿充仍永為常式

孔子祠

先儒及弟子附宋後魏北齊

漢

後漢魏

晉

漢元帝時孔霸以帝師賜爵號褒成君奉孔子後平帝

元始初追謚孔子曰褒成宣尼公追封孔均為褒成侯

○後漢光武建武十三年封均子志為褒成侯章帝元

和二年二月東巡狩因幸魯祠孔子七十二弟子

漢晉春秋

曰闕里者仲尼之故宅也在魯城中帝升廟西面羣臣中庭北面皆再拜帝進爵而後坐東觀書云祀禮畢命儒者論難也和帝永元四年徙封為褒尊侯相傳至獻帝初

國絕。魏文帝黃初二年以孔子二十一代孫議郎羨為宗聖侯邑百戶奉孔子祠令魯郡修舊廟置百石吏卒守衛。晉武帝太始三年改封孔子二十三代孫宗聖侯震為奉聖亭侯又詔大學及魯國四時備三牲以祀孔子明帝太寧三年詔給奉聖亭侯四時祀孔子祭

宜如太始故事。○宋文帝元嘉八年奉聖侯有罪奪爵至十九年又授孔隱之隱之兄子熙先謀逆又失爵二十八年更以孔惠雲為奉聖侯後有重疾失爵孝武大明二年又以孔邁為奉聖侯邁子卒莽謝俱反嗣有罪失

爵。○後魏封孔子二十七葉孫乘為崇聖大夫孝文帝太和十九年改封二十八葉孔珍為崇聖侯文成帝詔其宣尼之廟當別勅有司行薦饗之禮。○北齊改封三十一葉孫為恭聖侯。○後周武帝平齊改封鄒國公。○

隋文帝仍舊封鄒國公煬帝改為紹聖侯。○大唐貞觀十一年封孔子裔德倫為褒聖侯。二十一年制以左丘明卜子夏公羊高穀梁赤伏勝高堂生戴聖毛萇孔安國劉向鄭衆杜子春馬融盧植鄭玄服虔何休王肅王弼杜元凱范甯賈逵總二十二人並為先師永徽中制令改周公為先聖黜夫子為先師顏回左丘明從祀顯慶

二年禮部尚書許敬宗等奏曰准貞觀二十一年詔以孔子為先聖更添左丘明等二十二人與顏子俱配宣父於太學並為先師今據永徽令改用周公為先聖黜孔子為先師顏回左丘明並為從祀按禮記云凡學春

官釋奠於其先師鄭玄注云官為禮樂詩書之官也先
師者若禮有高堂生樂有制氏詩有毛公書有伏生可
以為之又曰始立學釋奠於先聖鄭注曰若周公孔子
也聖則非周即孔師則偏善一經考漢魏已來取捨各
異顏回孔子互作先師宣父周公更為先聖求其節文
通有得失所以貞觀之制正夫子為先聖加衆儒為先
師而今新令輒事刊改但周公攝政制禮作樂功比王
者祀之儒館實貶其功仲尼生衰周之末振文喪之弊
祖述堯舜憲章文武弘聖教於六經闡儒風於萬載故
孟軻稱生靈以來一人而已自漢以降奕葉繼侯崇奉
其聖迄於今日胡可降茲上哲俯入先師且又立明之
徒見行其學貶為從祀亦無故事今請改令從詔於義
為先其周公仍依禮配饗武王也

高宗乾封元年正月東巡次兗州鄒

縣頓祭宣父廟贈太師總章元年二月皇太子詣學贈

顏回太子少師曾參太子少保神龍初詔以鄒魯百戶封崇道公宣尼采邑用供薦饗又授裔孫褒聖侯崇階朝散大夫仍許子孫以相傳襲開元八年勅改顏生等十哲為坐像悉應從祀曾參大孝德冠同列特為塋像坐於十哲之次圖畫七十子及二十二賢於堂壁上以顏子亞聖親為之贊以書於石閔損以下令當朝文士

分為之贊

時國子司業李元瓘奏稱先聖孔宣父廟先師顏子配坐今其像立侍配饗合坐十哲弟

子雖復列像廟堂不應饗祀謹檢祠令何休范甯等二十二賢猶當從祀其十哲請春秋釋奠列享在二十二

賢之上七十子請准都監廟堂圖形於壁
為立贊又曾參孝道可崇獨受經於夫子請准二十二賢應饗

二十七年八月制夫子追贈謚為文宣王宜令三公持節勅令並撰儀注昔緣周公南面夫子西坐今位既有殊坐豈仍舊宜補其隆典永作常式自今以後夫子南面而坐內出王者袞冕之服以衣之十哲等東西列侍顏子淵既云亞聖須優其秩

顏子贈兗國公

閔子騫贈費侯

冉伯牛贈鄆侯

冉仲弓贈薛侯

宰子我贈齊侯

端木子貢贈黎侯

冉子有贈徐侯

仲子路贈衛侯

言子游贈吳侯

卜子夏贈魏侯

又夫子格言參也稱魯雖居七十之數不載四科之目
頃雖參於十哲終未殊於等倫久稽先旨俾修舊位庶
乎禮得其序人焉式瞻命尚書右丞相裴耀卿攝太尉
持節就國子廟冊冊畢所司奠祭亦如釋奠之禮又遣
太子少保崔琳往東都就廟行冊禮又勅兩京及兗州

卷五十三
舊宅廟像宜改服衮冕其諸州及縣廟宇既小但移南
面不須改衣服兩京樂用宮懸春秋二仲上丁令三公
攝行事七十子並宜追贈

曾參贈鄭伯

顓孫師贈陳伯

澹臺滅明贈江伯

宓子賤贈單伯

原憲贈原伯

公冶長贈莒伯

南宮子容贈鄭伯

公皙哀贈郕伯

曾點贈宿伯

顏路贈杞伯

商瞿贈蒙伯

高柴贈共伯

漆雕開贈滕伯

公伯寮贈任伯

司馬牛贈向伯

樊遲贈樊伯

有若贈卞伯

公西赤贈郛伯

巫馬期贈郛伯

梁鱣贈梁伯

顏柳贈蕭伯

冉孺贈紀伯

曹卹贈曹伯

伯虔贈聊伯

公孫龍贈黃伯

冉季贈東平伯

秦子南贈少梁伯

漆雕子歛贈武城伯

顏子精贈瑯琊伯

一作驕子

漆雕徒父贈須句伯

壤駟赤贈北徵伯

商澤贈睢陽伯

石作蜀贈石邑伯

任不齊贈任城伯

公夏守贈亢父伯

公良孺贈東牟伯

后處贈營丘伯

秦子開贈彭衙伯

奚容蒧贈下邳伯

公肩定贈新田伯

顏襄贈臨沂伯

鄒單贈銅鞮伯

句井疆贈淇陽伯

罕父黑贈乘丘伯

秦商贈上洛伯

申黨贈邵陵伯

公祖子之贈期思伯

榮子期贈雩婁伯

縣成贈鉅野伯

左人郢贈臨淄伯

燕伋贈漁陽伯

鄭子徒贈滎陽伯

顏之僕贈東武伯

原亢贈萊蕪伯

樂顏贈昌平伯

一作
效

廉潔贈莒父伯

顏何贈開陽伯

叔仲會贈瑕丘伯

狄黑贈臨濟伯

邽吳贈平陸伯

孔忠贈汶陽伯

公西與如贈重丘伯

公西歲贈祝阿伯

蘧瑗贈衛伯

施常贈乘氏伯

林放贈清河伯

秦非贈汧陽伯

陳亢贈潁伯

申枏贈魯伯

琴牢

未詳

顏噲贈朱虛伯

步叔乘贈淳于伯

琴張贈南陵伯

太公廟

大唐


大唐開元十九年四月兩京及天下諸州各置太公廟
一所以張良配饗春秋取仲月上戊日祭諸州賓貢武
舉人准明經進士行鄉飲酒禮每出師命將辭訖發日
便就廟引辭仍簡取自古名將功成業著弘濟生人者
十人准十哲例霑饗至乾元元年九月十二日太常少
卿于休烈奏臣昨因秋饗漢高祖廟見傍無侍臣饗太
公廟有張良在側伏以子房生於漢初翊奉高祖坐籌

帷幄佐定天下考其年代不接太公自古配食廟庭陪
葬陵寢皆取當時佐命同受哀榮太公人臣不合以張
良配饗請移於漢祖廟從之上元元年閏四月勅昔周
武創業克寧區夏惟師尚父實佐興王況德有可師義當禁
暴稽諸古昔爰崇典禮其太公望可追封為武成王有
司依文宣王置廟仍委中書門下擇古今名將准文宣
王置亞聖及十哲等饗祭之典一同文宣王貞元四年
八月兵部侍郎李紆奏曰太公廟准式以太常少卿充

三獻官祝文云皇帝遣某官敢昭告至上元元年追贈
為武成王饗祭之典一同文宣王有司因差太尉充獻
兼進祝版親署臣伏以太公即周之太師張良漢之少
傅聖朝列在祀典已極褒崇載在祝詞必資折中理或
過當神何敢歆今者屈禮於至尊施敬於臣佐每請御
署並稱昭告竊謂非宜一同文宣王恐未為允臣以為
文宣垂訓百代宗師五常三綱非其訓不明有國有家
非其制不立故孟軻稱自生人以來一人而已由是正

素王之法加先聖之名樂用宮懸獻差太尉尊師崇道
雅合正經其太公述作止於六韜勲業形於一代豈可
擬其盛德均其殊禮哉前件祝文請自今更不進署其
敢昭告請改為致祭其獻官請准式太常卿以下詔令
百寮集議聞奏兼大理卿于頔等四十六人議同李紆
左領軍大將軍令狐建等二十四人議曰當今兵革未
偃宜崇武教以尊古重忠烈以勸今欲有貶損非激勸
之道也追尊王位以時祠之為武教之主若不尊其禮

則無以重其教也文武二教國並宜立廢一不可況其
典禮之制已歷二聖今欲改之恐非宜也至九月有勅
以上將軍以下充獻官餘事依李紓所奏其祭饗獻儀
具開元禮



通典卷五十三

欽定四庫全書

史部
通典卷五十四

詳校官侍郎_臣李封

編修_臣程嘉謨覆勘

覆校官中書_臣田尹衡

校對官中書_臣王鍾泰

謄錄監生_臣周元濬

欽定四庫全書

通典卷五十四

唐 京兆杜佑 君卿纂

禮十四 吉十三

巡狩

唐虞

夏

周

秦

漢

後漢

魏

唐虞天子五載一巡狩

晏子對齊景公曰天子適諸侯曰巡狩白虎通曰巡者循也狩

者牧也為天下循行守牧民也道德太平恐遠近不同化幽隱有不得所者敬親行之行禮謹敬重人之至也鄭玄云諸侯為天子守土時一巡省之書曰五載一巡狩所以必五年者因天道時有所生歲有所成三歲一

閏天道少備五歲

再閏天道大備也歲二月東巡狩至于岱宗柴

岱宗東岳也時

謂太山為岱宗者以其處東北居寅丑之間萬物終始之地陰陽交代之所為衆山之宗故云岱宗也

望

秩于山川

張守節云乃以秩望祭東方諸侯境內名山大川也言秩五岳視三公四瀆視諸侯也

羣后四朝

孔安國曰各朝會於方岳之下凡四處故曰四朝也堯舜同道舜攝則然堯又可知也

肆覲東后

遂見東方之諸侯

協時月正日同律度量衡

時四月十

二月也日三百六十日也律法制也度丈尺也量斗斛也衡斤兩也鄭玄曰協正四時之月數日名脩有失誤

其節氣晦朔恐諸侯有不

修五禮

吉凶賓

五玉

五等諸侯之瑞

同故因巡狩而合正之

也執之曰瑞三帛二生一死贄

三帛纁玄黃三孤所執也二生羔鴈卿大夫所

執也一死者雉
士所執為禮焉

五月巡狩至南嶽

衡山也

八月巡狩至西

嶽

華山也

十一月巡狩至北嶽

恒山也

皆如岱宗之禮

白虎通曰

二月八月晝夜分五
月十一月陰陽終也

歸格于藝祖用特

孔安國曰巡狩四岳然後歸告

至文祖之廟藝文也言祖則考著特一牛也鄭玄注尚
書云每歸用特者明每一岳即歸也如尚書王制之文

所以不一岳之後而云歸者因明四岳禮同
使其文相次是以終巡狩之後乃始云歸耳

○夏后氏

因之

王肅云天子五年一巡狩鄭玄云五年者虞夏之制也

○周制十二年一巡

狩

大行人云十有二歲王巡狩殷國殷衆也謂當方諸侯周以木德王歲星是木王之星十二歲一周以木

象之故梁崔靈恩云取歲星一周天道之備數

天子將巡狩類乎上帝宜乎社

造乎禰

帝謂五精之帝所配祭南郊者謂靈威仰也類宜造皆祭名也按曾子問諸侯適天子告祖禰

此不言祖者自虎通云七廟皆告之獨言禰者辭特職先從禰後至祖以上遂行不敢留尊者之命故也

職

方氏先戒四方諸侯曰各修平乃守考乃職事無敢不

敬戒國有大刑

乃猶汝也守謂國境之內職事所當供具

及王之所行先道

帥其屬而巡戒令

先道先由王所後道居前其前日所戒之令

大馭掌犯軼

之禮

謂祖道也

土訓氏夾王車而行以待王問九州形勢

謂所

以道

山川所宜

所謂以詔地事

誦訓氏亦夾王車以所識久遠

之事以告王

誦訓所謂掌道方志以詔觀事若魯有大庭氏之庫穀之二陵也

又掌道

方慝

方慝四方言語所惡

以詔辟忌以知地俗

辟音避

乘金輅建大

旂

中車云金輅鉤樊纓九就建大旂以賓

歲二月東巡狩至於岱宗柴而

望祀山川

燔柴告感生之天帝

覲諸侯

覲見也

其方之諸侯先於境

首待之

祭義云天子巡狩諸侯待於境

所過山川則使祝宗先以三等

璋瓚皆以黃金為鼻流酌鬱鬯以禮神次乃校人殺黃

駒以祭之

玉人云大璋中璋九寸邊璋七寸射四寸厚寸黃金勺青金外朱中鼻寸衡四寸有緹天

子以巡狩宗祝以前馬鄭玄云鼻勺流也衡謂勺徑也於大山川則用大璋加文飾也於中山川用中璋殺文飾也於小山川用邊璋半文飾也又校人云凡將事於四海山川則殺黃駒鄭玄曰謂王巡狩過大山川也

每宿舍掌舍設桎杻再重

謂行馬再重者以周衛有外內列杻音互

其外則

土方氏又設蕃籬

土方氏云王巡狩則樹王舍鄭云云為之蕃籬

既至方岳先

問百年就見之若未滿百年八十九十者路經其門則

見之不然則不

祭義所謂東行西行弗敢過

天子乃令太師採人歌

謠之詩以樂播而陳之以觀人風俗以審其善惡

所謂命太

師陳詩以觀民風也

命典市之官陳百物之貴賤以觀人之所好

惡

所謂命市納價以觀人之所好惡志淫好辭故鄭云淫則侈物貴人之志淫邪則所好者不正也

又

命典禮之官考校四時節氣月之晦朔甲乙等日及候

氣之律呂所用禮樂宮室車旗等制度君臣上下之衣

服皆以王者所頒制度考校之

所謂命典禮考時月定日同律禮樂制度衣服

正之注云同陰律也

諸侯封內有名山大川不舉而祭之者為不

敬不敬者君削其地有祭宗廟不順昭穆者為不孝不

孝者君絀以爵

不順為背逆昭穆者以宗廟可以表官爵故絀之

變禮易樂者

為不從不從者君流

流放也

革制度衣冠者為畔畔者君

討有功德於民者加地進律

律法度也

其諸侯待王之牢禮

以一犢

掌客云王巡狩殷國則國君膳以牲犢又郊特牲云天子適諸侯諸侯膳用犢貴誠之義也天

子牲孕弗食也

既黜陟諸侯乃與之相見於方岳之下築壇與

覲禮壇制同

鄭玄注司儀職引覲禮制王巡狩殷國而同則其為宮亦如此

其壇外為

土埒方三百步開四門壇方九十六尺高四尺上為堂

下為三等謂之三成成每等高一尺其堂上置司盟之

神位謂之方明

覲禮云諸侯覲於天子為宮方三百步開四門壇有十二尋深四尺加方明於

上鄭玄云宮為壇土為埒以象牆壁八尺曰尋十二尋則方九十六尺也深謂高也從上向下曰深方明者上

下四方神明之象也會同而盟監之天之司盟有象者猶宗廟之有主乎其方明狀具朝覲篇司儀職云其壇

三成宮旁一門鄭玄云成猶重也三重者下差之為三等每面丈二尺也

見諸侯之時據鄭

注司儀及覲禮諸侯之上介各以其君之旂置於宮內
以表立位之處乃詔王升壇訖諸侯皆就其旂而立其
位鄭按明堂位諸公中階之前北面東上諸侯阼階之
東西面北上諸伯西階之西東面北上諸子門東北面
西上諸男門西北面東上王乃於壇上揖之以定其位
其揖之節有三儀與王無親者推手小下之司儀所謂
土揖庶姓
與王婚姻之親者平推手揖之所謂時
揖異姓與王同姓者推
手小舉之所謂天
揖同姓王既揖定其位諸侯乃進升壇奠玉

又按司儀職及鄭注云公於上等奠桓珪玉陳擯者五人禮之侯伯於中等奠信珪躬珪玉陳擯者四人禮之子男於下等奠穀璧蒲璧玉陳擯者三人禮之諸侯各奠玉訖降拜又升成拜訖擯者乃延諸侯升堂授王玉訖乃以璧琮行享禮謂之將幣

玉人云璧琮九寸諸侯以享天子是也

諸

侯既朝見王訖乃退而自相與盟王宮之伯臨之其神

主於月必因以祭之

覲禮云祭天燔柴祭山丘陵升祭川沈祭地瘞鄭注云升沈必就祭

者也就祭則是謂王巡狩諸侯之盟祭也

其餘五月南巡狩至於南嶽如東

巡狩之禮八月西巡狩至於西嶽如南巡狩之禮十有

一月北巡狩至於北嶽如西巡狩之禮

巡狩之月皆用正歲之仲月者

以王者考禮正刑當得其中春秋分晝夜均冬夏至陰陽終欲取終平之義故唐虞以還皆用仲月也巡

狩訖却歸每廟用一牛以告至謂之歸格於祖禰用特

特一牛

○秦始皇三年東巡郡縣祠鄒嶧山頌功業

其年復遊

海上二年遊碣石從上郡歸五年始南至湘山遂登會稽並海到沙丘崩此求神仙奇藥之術無復觀人風問

百年也並步浪反下同

二世元年東巡碣石並海南歷泰山至會

稽皆禮祠之而刻勒始皇所立石書旁以彰始皇之功

德○漢武帝元狩四年始巡郡縣寢尋於泰山

寢漸尋就也寢

浸音元封初復至海上又北至碣石巡自遼西歷北邊至

九原五月乃至甘泉周萬八千里

武帝亦如秦始皇之事

○後漢

光武建武三十年三月幸魯

漢祀令曰天子行有所之出河沈用白馬珪璧各一

衣以繒緹五尺祠用脯二束酒六升鹽一升涉渭灞涇洛他名水如此者沈珪璧各一律在所給祠具及行沈祠他川水先驅投石少府給珪璧不滿百里者不沈過泰山祭山及梁父章帝元

和二年二月東巡狩使使者奉一大牢祠帝堯於濟陰

成陽靈臺至泰山辛未柴祭天地羣神如故事壬申宗

祀五帝於孝武所作汶上明堂光武配卒事遂覲東后
饗賜王侯羣臣因行郡國幸魯祠東海恭王及孔子七
十二弟子四月還京師庚申告至祠高廟光武廟各一
特牛安帝延光三年東巡狩至泰山柴祭及祠汶上明
堂如元和中故事○魏明帝凡三東巡狩所過存問高
年恤疾苦或賜穀帛有古巡幸之風焉齊王正始中巡
洛陽縣賜高年力田各有等差○晉初新禮巡狩方岳
柴望告設壇宮如禮諸侯之覲者賓及執贄皆如朝儀

而不建旗

摯虞以觀禮諸侯各建其旗章所以殊爵命示等威詩稱君子至止言觀其旂宜定新禮

建旗如舊禮詔可其議然終晉代其禮不行武帝太始四年詔使使持節侍中黃門侍郎銜命四出周行天下其萬人之利害為一書禮俗政事教治刑禁逆順為一書背逆暴亂作慝犯令為一書喪荒凶厄貧苦為一書康樂和親安平為一書每國辨異之以反命於王

○宋文帝元嘉四年二月東

巡狩至於丹徒告覲園陵三月饗會父老舊勲於行宮

加賜衣裳幣帛蠲租原刑戰亡之家單孤並隨宜隱卹

二十六年二月東巡幸至京城并謁二陵會舊京故老

萬餘人饗勞齋發赦蠲徭役○後魏文成帝和平元年

正月東巡狩歷橋山祀黃帝遼西遙祀鑿無閭山遂緣海幸冀州北至中山過常嶽禮其神而返明年南巡過石門遣使者用玉璧牲牢禮衡嶽○隋煬帝自文帝山陵纔畢即事巡遊乃襲秦皇漢武之事西征東幸無時暫息六宮與文武吏士常十餘萬人然非省方展義之行也○大唐皇帝將巡狩所司承制先頒告於東方諸州曰皇帝二月東巡狩各修平乃守考乃職事駕將發告圓丘宗廟社稷皆如開元禮

高宗調露元年九月幸并州令度支郎中狄仁

傑為知鎮使并州長史李知玄以道出妬女祠俗云盛衣服過者必致風雷之變遂發數萬人別開御道仁傑曰天子之行千乘萬騎風伯清塵雨師洒道何妬女之害遽令罷之上聞之嘆曰真大丈夫也○評曰

梁崔靈恩三禮義宗云唐虞五載巡狩一嶽二十年方遍四嶽周則四十八年矣若一出四嶽皆遍且闕四時祭享唐虞衡山為南嶽周氏霍山為南嶽其制吉行五十里若以二月到東嶽五月到南嶽八月到西嶽十一月到北嶽路程遼遠固不及此知每至一嶽即歸斯義為長也按尚書周官篇云六年五服一朝又六年王

乃時巡考制度諸侯各朝於方嶽大明黜陟

孔安國注云周制十

二年一巡狩春東夏南秋西冬北故曰時巡考制度正禮法如虞帝然其四方諸侯各覲於方岳之下大明考

黜陟幽明

又按堯舜簡儉常稱茆茨土階巡狩四方羽儀

導從必少一年四嶽五載復往宗廟享祭暫委有司展

義省方觀風察俗之大政如或二十年方遍及於民物

不亦乖踈詳周官本文與孔氏注解既改制十有二載

比唐虞已甚遐闊如四十八年乃遍豈非益為曠邈乎

且周雖尚文天子諸侯降殺以兩穆王巡歷天下萬姓

不甚苦勞始皇遊幸四方屬車八十一乘二漢以降至於隋或東封告成或觀省風俗百辟悉至羣司畢從不下十餘萬人何止千乘萬騎所以曠代多闕斯禮崔生謂堯舜及周帝王行幸車徒禮數與秦漢以後無異斯不達古今豐約之別復不詳周官之文輒肆臆度之說耳

封禪

無懷

伏羲

神農

黃帝

顓頊

帝嚳

帝堯

禹

湯

周

秦

漢

後漢

魏

晉

宋

後魏

北齊

隋

大唐

古者帝王之興每易姓而起以致太平必封乎泰山所

以告成功也禮云因名山升中于天

封禪必於泰山者萬物交代之處封

增其高順其類也升上也中成也刻石紀號著已功績

封訖而禪梁甫亦以告太

平也

封禪者高厚之道也封土於山而禪祭於地天以高為尊地以厚為德增泰山之高以報天厚梁甫

之階以報地明天之所命功成事就有益於天地有若天地之更高厚然梁甫者泰山之支山卑下者也能以道配成高德故禪梁甫亦以告太平也

無懷氏封泰山禪云云

管仲對齊桓公曰古

者封泰山禪梁父者七十二家而夷吾所記者十有二焉而昔有無懷氏古之王者在伏羲前韓詩外傳曰孔子升泰山觀易姓而王可得而數者七十餘氏不可得而數者萬數袁准正論曰唯周官有王太封之文按成

王封禪而文武皆不在七十二君而無一言見於經傳學者疑焉服虔曰云云在梁甫東山名也晉灼曰云云

在蒙陰縣故城北東有云云亭○伏羲神農並因之○黃帝禪亭亭服虔

曰亭亭在牟陰晉灼曰地理志鉅平有亭亭山○顓頊帝嚳帝堯舜復禪云云

○禹禪會稽會稽越地○湯亦禪云云其所封皆於泰山也

○周成王封泰山禪社首應劭曰社首山名在博縣晉灼曰在鉅平南十里其

儀不存襄王時齊桓公既伯會諸侯於葵丘而欲封禪謂管仲曰寡人兵車之會三而乘車之會六九

合諸侯一匡天下諸侯莫違我者三代受命亦何以異乎於是管仲觀桓公不可窮以辭因設之以事曰古之

封禪必鄙上之泰北里之禾所以為盛江淮之間一茅三脊所以為藉也東海致比目之魚西海致比翼之鳥

然後物有不召而自至者十有五焉今鳳凰麒麟不
至嘉禾不生而欲封禪無乃不可乎於是桓公乃止○

秦始皇平天下三年東巡郡縣祠鄒嶧山頌秦功業於
是徵齊魯儒生七十人至於泰山下諸儒或議曰古者
封禪為蒲車惡傷山之土石草木掃地而祭席用菹稽
音戛稽禾稟也去其皮以為席菹音祖言其易遵也始皇聞此議各乖異

難施用由此黜儒生而遂除車道上自泰山陽至巔立
石頌德文曰事天以禮立身以義事父以孝成人以仁
四守之內莫不郡縣四屬八蠻咸來貢職人庶蕃息天

祿永得刻石改號

文出晉太康郡國志

有金冊石函金泥玉檢之

事焉從陰道下禪梁甫其禮頗采秦祀之祝雍上帝所

用封藏而皆秘之固不得而記焉

封禪之後十二歲秦亡諸生疾秦焚詩書

戮文學皆偽曰始皇上泰山為雷雨所擊不得封禪

○漢武帝立二十八年元鼎

中汾陰得寶鼎遂議封禪而羣儒不能知其儀又牽拘

於詩書古文於是帝盡罷諸儒三月東上泰山命人上

石立之泰山巔石高二丈一尺方博皆三尺壇及墀皆

廣長十二丈增高三尺帝因東至海上四月還至奉高

晉太康郡國志曰奉高戶千五百六戶此為奉高者以
事東岳帝王禪代之處是以殊之也故有明堂在縣西
南四里又

有奉高宮

又至梁父禮祠地主乙卯令侍中儒者皮弁

薦紳射牛行事封泰山下東方如郊祠太一之禮封廣

丈二尺高九尺其下則有玉牒書書祕禮畢天子獨與

侍中奉車子侯

霍去病子也

上泰山亦有封其事皆禁明日

下陰道丙辰禪泰山下趾東北肅然山

晉太康郡國志曰漢武封泰山

禪梁父參諸家所說宜肅然為定也

如祭后土禮天子皆親拜冠衣尚黃

而盡用樂焉江淮間一茅三脊為神藉五色土益雜封

縱遠方奇獸飛禽及白雉諸物頗以加禮兕牛犀象之屬不用皆至泰山祭后土封禪祠其夜若有光晝有白雲起封中天子從禪還坐明堂羣臣更上壽改元為元封

時作明堂於汶上太史公曰其封禪之禮則有司存而漢史不得其制

○後漢光武建

武三十年羣臣上言宜封禪泰山詔書曰即位三十年百姓怨氣滿腹吾誰欺欺天乎三月帝幸魯過祭泰山及梁父三十二年詔梁松按索河雒讖文言九世封禪事者松等列奏乃許焉

東觀書曰羣臣奏言登封告成為民報德百王所同陛下輒拒

絕不許臣下不求元封時故事議封禪所施用有司奏
敢頌功述德業

當用方石再累置壇中皆方五尺厚一尺用玉牒書藏
方石牒厚五寸長尺三寸廣五寸有玉檢又用石檢十
枚列於石旁東西各三南北各二皆長三尺廣一尺厚
七寸檢中刻三處深四寸方五寸有蓋檢用金縷五周
以水銀和金以為泥玉璽二其一方一寸二分其一五
寸方石四角又有距石皆再累枚長一丈厚一尺廣二
尺皆在圓壇上其下用距石十八枚皆高三尺厚一尺

廣二尺如小碑環壇立之去壇三步距石下皆有石跗入地四尺又用石碑高九尺廣三尺五寸厚尺二寸立壇丙地去壇三丈以上以刻書帝以用石功難又欲及

二月封禪故詔梁松欲因故封石空檢更加封而已

及欲

二月者虞書歲二月東巡狩至於岱宗柴祭山日燔柴加牲於其上而燔之也松上疏爭之以

為登封之禮告功皇天垂後無窮以為萬民也承天之

敬尤宜章明奉圖書之瑞尤宜顯著今因舊封竄寄玉

牒故石下恐非重命之義受命中興宜當特異以明天

意遂使泰山郡及魯趣音促石工宜取完青石無必五色

令印工刻玉牒書書秘刻方石中令容玉牒二月帝至

奉高

應劭曰漢官馬第伯封禪儀記曰車駕正月二十八日發雒陽宮二月九日到魯十二日宿奉高遣

虎賁郎將先上山三按行還益治道徒一千人十五日始齋諸扈從王公以下及東方諸侯盡齋馬第伯自云某等七十人先之山虞觀祭山壇治石石二枚狀博平園九尺此壇上石也其一石武帝時石也時用五車不能上因置山下為屋號五車石四維距石長丈二尺廣二尺厚尺半所四枚檢石長三尺廣六寸狀如封篋長檢十枚一紀號石高丈二尺廣三尺厚尺二寸名曰立石一枚刻文字紀功德是朝上山騎行往往道峻峭下騎步牽馬乍步乍騎且相半至中觀留馬去平地二十里南向極眺無不覩仰望天闕如從谷底仰觀抗峯其

為高也如視浮雲其峻也石壁宵窕如無道逕殊不可
上四布僵卧石上有頃復蘇亦賴賫酒脯處處有泉水
目輒為之明復勉強相將行到天闕自以已至尚十餘
里其道傍山脇大者廣八九尺狹者五六尺仰窺岩石
松樹鬱鬱蒼蒼若在雲中俛視谿谷碌碌不可見丈尺
遂至天門之下仰視天門變遠如從穴中視天直上七
里賴其羊腸逶迤名曰環道往往有絙索可得而登也
兩從者扶掖前人相牽後人見前人履底前人見後人
頂如畫重累人耳早食上哺後到天門使者得銅物形
狀如鍾又方柄有孔疑封禪具也汝南人楊通得之東
北百餘步得封所始皇立石及闕在南方漢武在其北
二十餘步得北岳圓臺高九尺方圓三丈所有兩陛從
東陞上臺上有壇方一丈二尺所上有方石四維有距
石四面有闕鄉壇再拜謁人多置錢物壇上亦不掃除
國家上見之則詔書所謂酢梨酸棗狼藉散錢處數百
幣帛具道是武帝封禪至泰山下未及上百官為先上

跪拜置梨棗錢於遣侍御史與蘭臺令史將工先上山

刻石

文曰維建武三十有二年二月皇帝東巡狩至於岱宗崇望秩於山川班於羣神遂覲東后從臣太

尉熹行司徒事特進高密侯禹等漢賓二王之後在位孔子之後褒成侯序在東后蕃王十二咸來助祭河圖赤伏符曰劉秀發兵捕不道四夷雲集龍闔野四七之際火為主河圖會昌符曰赤帝九世巡省得中治平則封誠合帝道孔矩則天文靈出地祇瑞興帝劉之九會命岱宗誠善用之姦偽不萌赤漢德興九世會昌巡岱皆當天地扶九崇經之常漢大興之道在九世之王封於泰山刻石著紀禪於梁父退省考五河圖合古篇曰帝劉之秀九名之世帝行德封刻政河圖提劉子曰九世之帝方明聖持衡矩九州平天下子雄書甄曜度曰赤三德昌九世會修符合帝際勉刻封孝經鉤命決曰予誰行亦劉用帝三建孝九會修專茲竭行封岱青河

維命后經識所傳昔在帝堯聰明密微讓與舜庶後裔
握機王莽以舅后之家三司鼎足冢宰之權勢依託周
公霍光輔幼歸政之義遂以篡叛僭號自立宗廟隳壞
社稷喪亡不得血食十有八年揚徐青三州首亂兵革
橫行延及荊州豪傑兼并百里屯聚往往僭號北夷作
寇千里無烟無雞鳴狗吠之聲皇天眷顧皇帝以匹庶
受命中興年二十八載興兵起是以中次誅討十有餘
年罪人則斯得黎庶得居爾田安爾宅書同文車同軌
人同倫舟輿所通人迹所至靡不貢職建明堂立辟雍
起靈臺設庠序同律度量衡修五禮五玉三帛二牲一
死贄吏各修職復於舊典在位三十有二年年六十有
二乾乾日昃不敢荒寧涉危歷險親巡黎元恭肅神祇
惠恤耆老理庶遵古聰允明恕皇帝惟慎河圖雒書正
文是月辛卯柴登封泰山甲午禪於梁陰以承靈瑞以
為兆民永茲一字垂於後昆百寮羣
臣郡守師尹咸蒙祉祐永永無極

二十二日辛卯晨

燎祭天於泰山下南方羣神皆從祀用樂如南郊諸王王者後二公孔子後襲成君皆助祭位事也事畢將升封或曰泰山雖已從食於柴祭今親升告功宜有禮祭於是使謁者以一特牲於常祠泰山處告祠泰山如親耕軀劉先祠先農先虞故事至食時帝御輦升山日中後到山更衣早晡時即位於壇北面羣臣以次陳後西上畢位升壇尚書令奉玉牒檢皇帝以寸二分璽親封之訖太常命人發壇上石尚書令藏玉牒已復石覆訖

尚書令以五寸印封石檢

封禪儀曰以金為繩以石三檢東方西方各三檢檢中石

泥及壇土各如其方色

事畢皇帝再拜羣臣稱萬歲命人立所刻

石碑乃復道下二十五日甲午禪祭地於梁甫陰以高

后配山川羣神從祀如元始中北郊故事

服虔曰禪廣土也項威曰

除地曰禪後改禪曰禪神之也

四月己卯大赦天下以建武三十二年

為建武中元元年以吉日刻玉牒書函藏金匱璽印封

之乙酉使太尉行事以特牲告至高廟太尉奉匱以告

高廟藏於廟室西壁石室高主室之下

司馬彪論曰自上皇以來封泰

山者至周七十二代易姓則改封者著一代之始明不相襲也繼世之王巡狩則有修封以祭而已自秦始皇孝武帝封泰山本因好神仙信方士之言及造石檢即將無事於檢封之間而樂難攻之石也且唯封為改代夏少康周宣王由廢復興不聞改封光武欲因孝武故封而梁松固爭以為必改乃當天意既封之后未有能福而松卒被誅死雖罪由身作蓋亦誣神之咎也且帝王所以能大著於後者實在其德加於人不聞其在封矣崔靈恩曰自周以前封者皆封土為壇至秦皇漢武始用石檢袁宏曰夫揖讓受終必有至德於天下征伐革命則有大功於萬物是故王者初基則有封禪之事蓋以其成功告於神明者也夫東方者萬物之所始山岳者靈氣之所宅故求之物本必於其始取其所通必於所宅崇其壇場則謂之封明其代興則謂之禪然則封禪者王者開務之大禮也德不周洽不得輒議斯事

功不弘濟不得彷彿斯禮曠代一有其道至高故自皇
帝堯舜至於三代各一得封禪未有中修其禮者也雖
繼體之君時有功德此蓋率復舊業增修其前政不得
仰齊建國開基改物者也夫神道貞一其用不煩天地
易簡其禮尚質故藉用白茅貴其誠素器用陶匏取其
易從封禪之禮簡易可也若夫石函玉牒非天地之性

也○魏明帝時中護軍蔣濟請封禪帝雖拒濟議而實
使高堂隆草封禪儀以天下未一不欲便行大禮會高
堂隆卒不行○晉武帝平吳太康九年衛瓘議封禪帝
曰此盛德之事所未議也瓘等又奏至於再三詔報絕
之○宋文帝在位長久有意封禪詔學士山謙之草其

儀注屬後魏師南逼其意乃息孝武大明元年十二月
戊申太宰江夏王義恭表三請帝以文軌未一不從○
北齊有巡狩之禮並登封之儀竟不行○隋開皇十四
年羣臣請封禪文帝命牛弘等創定其禮帝曰此事體
大朕何德以堪之但當東狩因拜岱山○大唐貞觀十
一年左僕射房玄齡等議按封禪者本以功成告於上
帝天道崇質義取醇素故藉用藁秸罇以瓦甌又按梁
甫是謂梁陰近代設禮壇於山上乃乖處陰之義今定

欽定四庫全書

通典
卷五十四

十六

壇位於山北又議昊天上帝壇將封先祭義在告神因當為壇下趾先陳齋絜贊饗已畢然後登封既表重慎之深兼示行事有漸今請祭於泰山下設壇以祀上帝太祖景皇帝配享壇方十二丈高丈二尺又議制玉牒長尺三寸廣厚各五寸玉檢厚二寸長短闊狭一如玉牒其印函請隨璽大小仍纏以金繩五周又議玉冊四枚各長尺三寸廣寸五分每冊五簡俱以金編其一奠上帝一奠太祖座一奠皇地祇一奠高祖座又議金匱

長短令容玉冊高廣各六寸形制如今之表函纏以金
繩封以金泥印以受命璽又議方石三枚以為冊累其
十枚石檢刻方石四邊而立之纏以金繩封以石泥印
以受命璽又議泰山上圓壇廣五丈高九尺用五色土
加之四面各設一陛御位在壇南升自陛而就上封玉
牒又議圓壇上土封曰凡言封者皆是積土之名今請
於圓壇上安方石壘緘既畢加土築以為封高丈二尺
而廣二丈以五色土益封玉牒書藏其內祀禪之所土

封制亦同此又議玉璽曰詳載前方石緘封玉檢金泥
必資印璽以為秘固請依今用受命璽以封石檢其玉
檢既與石檢大小不同請更造璽一枚方寸二分文同
受命以封玉牒石檢形制依後漢建武故事又議立碑
曰勒石紀號垂裕後昆羨盛德之形容闡后王之休烈
其義大矣請刻頌立碑明揚功業又議設告至壇曰既
至山下禮告至哉於東方上帝遍於羣神今請其壇方
八十一尺高三尺陛仍四出其禪方壇及自餘儀式請

如今禮仍請敕祭同時行事又議廢石闕及大小距石

詔從此議餘皆罷之遂附制於今禮

太常舊儀封禪降神樂歌並用郊祀

之辭韋安仁駁之曰夫祭天作樂本謂神聽高遠聲臭難接所以歌詠文辭依倚絃管滌蕩宣暢其來格今

瘞玉燔敕於岱宗之下播聲昭告請降圓丘之上夫神聽聰明不可濫假如依樂聲應臨國內而泰山之下其

神可得祀乎又毛詩周頌郊祀歌昊天封禪歌時邁二篇各別足是証明謂宜採周頌創新篇告精誠於上天

請皇陵於東岳於事合古其后竟從安仁之議

麟德二年有司進儀注於大嶽

南四里為圓壇三成十二陛如圓丘之制壇上飾以青

四面各依方色并造燎壇及壝三重又造玉冊三枚皆

以金繩編玉牒為之每牒長尺二寸廣寸二分厚三分
刻玉填金為字又為玉匱一以藏正座冊為金匱二以
藏配座冊各長尺三寸并玉檢方五寸當繩纏處刻為
五道當封璽處刻深二分方寸二分又為金繩以纏玉
匱各五周為金泥以金泥之為玉璽一枚方寸二分文
同受命璽以封金玉匱又為石礧以藏玉匱用方石再
累各方五尺厚一尺刻方石中令容玉匱礧旁施檢處
皆刻深三寸三分闊一尺當繩處皆刻深三分闊寸五

分為石檢十枚以檢石礧皆長三尺闊一尺厚七寸皆刻為印齒三道深四寸當封壘處方五寸當通繩處闊寸五分皆有小石蓋制與檢刺處相應以檢擻於協反封

泥其檢立於礧旁南方北方各三東方西方各二去礧隅皆七寸為金繩以纏石礧各五周徑三分為石泥以泥石礧其泥末石和方色土為之為距石十二枚分距礧隅皆再累各闊二尺厚一尺長一丈斜刺其首令與礧隅相應以五色封之泰山之上設登封之壇上徑五

丈二尺高九尺四出陛壇上飾以青四面依方色一壇
隨地之宜又為降禪壇於社首山上方壇八隅一成八
陛如方丘之制壇上飾以黃四面依方色三壇隨地之
宜其玉冊玉匱石礧石檢距石等亦同封祀之制又以
高祖太宗配禪社首以太穆文德皇后同配皆以公卿
充亞獻終獻之禮制曰古今典制文質不同至於制度
皆隨代沿革唯祀天地獨不改張斯乃自處於厚奉天
以薄又今封禪即用玉牒金繩器物之間復有瓦罇秸

席一時行禮文質頓乖駁而不倫深為未愜其封祀降
禪所設上帝后土位先設藁秸瓦甌瓢杯等物並宜改
用茵褥疊爵其諸郊祀亦宜准此於是昊天上帝之座
褥以蒼皇地祇座褥以黃配帝及后褥以紩五方上帝
及大明夜明褥皆以方色內官以下席皆以莞

封禪使
許敬宗

為禮官等又奏曰謹按司馬彪續漢書建武三十二年
封太山求元封故事所施用者有司奏用玉牒書藏方
石中厚五寸長尺三寸廣五寸有玉檢厚二寸長短闊
狹一如玉牒又按說文云簡牒也則知牒是簡之別名
且牒是片竹故其字從片封禪牒雖用玉其制宜與竹
同廣厚五寸何名簡牒又按孝經鈎命決云六經冊長

尺四寸孝經冊長尺二寸通檢古之簡牒無尺三寸之制臣等參詳典故務取折衷其玉牒請同玉簡冊長尺二寸廣寸二分厚三分以金繩連編固簡之數隨文多少盛之玉匱封牒石內則合古文於事為允詔從之

三年春正月戊辰朔有事於泰山親祀昊天上帝於封祀之壇己巳登於泰山行封禪之禮庚午降禪於社首

山壬申大赦天下改元乾封

初議射牛事太常博士裴守貞奏曰據周禮及國語

郊祀天地天子自射其牲漢武封泰山令侍中儒者射牛行事至於餘祀亦無射牲之文但親自射牲雖是禮書久從廢省據封禪記曰未明十五刻宰以鸞刀割牲比鑾駕至時牢牲總畢陛下唯奠玉酌獻而已今若祀前一日射牲事即傷早起日方始射牲事又傷武太后晚若依漢武故事即非親射之儀事不可行

天冊萬歲二年臘月甲申登封於嵩岳大赦天下改元
為萬歲登封丁亥禪於少室山開元十二年制以十三
年有事泰山所司與公卿諸儒詳擇典禮先為備具中
書令張說右散騎常侍徐堅等與禮官撰東封儀注張
說謂徐堅等曰乾封舊儀禪社首享皇地祇以先后配
享王者父天而母地皇地祇雖當今皇母位亦當徃帝
之母也子配母饗亦有何嫌而以皇后配地祇非古之
制也天鑒孔明福善如響乾封之禮文德皇后配皇地

祇天后為亞獻越國太妃為終獻以宮闈接神有乖舊
典上元不祐遂有授命易姓之事宗社中祀公族誅滅
皆由此也景龍之季有事圓丘韋庶人為亞獻皆以婦
人升壇執籩豆饔黷穹蒼享禮不潔未及踰年國有大
難亞獻終獻皆受其咎平座齋郎及女人執祭者多亦
夭卒今主上尊天敬神事皆革正斯禮請以睿宗大聖
真皇帝配皇地祇侑神作主從之又按顯慶年許敬宗
因修禮奏改燔柴在祭前伏稱祭祀之禮必先降神周

人尚臭祭天則燔柴者臣等謹按禮迎神之儀樂六變而天神降八變而地祇出九變則鬼神可得而禮矣則降神以樂周禮正文非謂燔柴以降神也又按晉郭璞南郊賦及注爾雅亦祭後方燔又按宋志所論亦祭後燔柴又檢南齊北齊又梁郊祀亦先飲福酒訖燔燎請依貞觀舊禮先祭後燎考功員外趙冬曦太學博士侯行果又曰先焚者本以降神行之已久若設祭後燔則神無由降矣張說又執奏曰凡祭者本以心為主心至

則通於天地達於神祇既有先燔後燔自可斷於聖意
聖意所至則通於神燔之先後臣等不敢裁定上令依
後燔及先奠牲璧之議是後太常卿寧王憲奏請郊壇

時並依此先奠璧而後燔從之

先是紛議未定國子博士康子元執後燔最堅

張說謂子元曰康國子獨出蒙輪以當一隊耶時又有四門助教施敬本駁奏舊封禪禮八條其畧曰舊禮侍中跪取沃盥非禮也夫盥手洗爵人君將以致潔而尊神故使小臣為之今侍中大臣也而沃盥於人君太祝小臣也乃詔祝於天神是接大神以小臣奉人君以大故為非禮按周禮大宗伯曰鬯人下士二人裸事則沃盥此其職也漢承秦制無鬯人之職故使近侍為之魏晉至今因而不改然則漢侍中行之則可矣今以侍

中為之則非也漢侍中其始也微高帝時藉孺為之惠
帝時閼孺為之留侯子辟彊年十五為之後漢婁堅以
議郎拜侍中魏代蘇則為之時友人嘲之曰仕進不止
執獸子是言其褻臣也今侍中名則古官人非昔任掌
同燮理寄重鹽梅非復漢魏執獸之班異乎周禮鬱人
之職夫祝以傳命通人主之意以薦達於神明非賤職
也故兩君相見則卿為上儔況天人之際其肅恭之禮
以兩君為喻不亦大哉今太祝下士也非所以重命而
尊神之義也然則周漢太祝是禮矣何者按周禮大宗
伯曰太祝下大夫二人上士四人掌六祝之詞大宗伯
為上卿今禮部尚書太常卿比也小宗伯中大夫今侍
郎少卿比也太祝下大夫今郎中太常丞比也上士四
人今員外郎太常博士比也故可以處天人之際致尊
極之詞矣今太祝下士卑而居下大夫之職又舊禮謁
者引太尉升壇亞獻非禮也謁者已賤升壇已重是微
名用之於古而大體實變之於今也古之謁者秩異乎

今謁者班微以之從事可謂踈矣又曰舊禮尚書令奉玉牒今無其官請以中書令從事議奏上令張說徐堅召敬本與對議詳定說等奏曰敬本議其中四事先以改定有不同者望臨時量事改攝從之

十三年

十月封祀於泰山去山趾五里西去社首山三里丁亥服袞冕於行宮致齊於供帳前殿己丑大備法駕至山下乃御馬而登侍臣從帝以靈山清潔不欲多人上欲初獻於山上壇行事亞獻終獻於山下壇行事召禮官學士賀知章等入講儀注因問之知章等奏曰昊天上帝君位五方精帝臣位帝號雖同而君臣各異陛下享

君位於山下羣臣祀臣位於山下誠足以垂範來葉為
變禮之大者也禮成於三初獻亞獻終獻合於一處於
是三獻悉於山上行事其五方帝及諸神座於山下壇
行事玉牒詞曰有唐嗣天子臣某敢昭告於昊天上帝
天啓李氏運興土德高祖太宗受命立極高宗升中六
合殷盛中宗紹復繼體不定上帝眷祐錫臣忠武底綏
內難推戴聖父恭承大寶十有三年敬若天意四海晏
然封祀岱岳謝成於天子孫百祿蒼生受福唐寅祀昊

天上帝於山上封臺之前壇高祖神堯皇帝配享焉辛

卯享皇地祇於社首之泰折壇

折音之設反

睿宗大聖真皇

帝配壬申上御朝覲之帳殿大備陳布文武百僚二王

後孔子後諸方朝集使岳牧舉賢良咸在位銘曰維天

生人立君以理維君受命奉天為子代去不留人來無

已德涼者滅道高斯起赫赫高祖明明太宗爰革隋政

奄有萬邦罄天張宇畫地開封武稱有截文表時雍高

宗稽古德施周溥茫茫九夷削平一鼓禮備封禪功齊

舜禹巖巖岱宗衍我神主中宗紹運舊邦維新恭已南
面氤氲化淳告成之禮留諸後人緬余小子重基五聖
匪功伐高匪德矜盛欽若祀典丕承永命至誠動天福
我萬姓古封泰山七十二君或禪亭亭或禪云云其迹
不見其名可聞祇邁文祖光昭舊勲方士虛誕儒書不
足佚后求仙誣神檢玉秦灾風雨漢汙編錄德未合天
或承之辱道在觀政名非從欲銘心絕岩播告羣岳時中
書令張說撰封祀壇頌侍中源乾曜撰社首壇
頌禮部尚書蘇頌撰朝覲壇頌以紀聖德焉其儀具

開元禮

通典卷五十四

欽定四庫全書

通典卷五十五

唐 京兆杜佑君卿纂

禮十五 吉十四

告禮

商

周

魏

東晉

梁

大唐

古者天子將巡狩必先告於祖命史告羣廟及社稷圻
內名山大川七月而徧親告用牲史告用幣

子思之語

○商

湯將伐桀告天云予小子履

履湯名

敢用玄牡敢昭告于

皇皇后帝

商尚白未變夏禮故用玄牡也

有罪不敢赦帝臣不蔽簡在

帝心

言祭居帝臣之位罪過不可隱蔽已簡在天心

朕躬有罪無以萬方萬方

有罪罪在朕躬○周制天子將出類乎上帝造乎禰太

祝告王用牲幣

鄭玄云牲當為制王肅云親告以牲有典故也使祝史用幣又云吉則用牲凶

則用幣

○魏尚書薛悌奏涼州刺史所上靈命瑞圖當下

洛陽留臺使太尉醺告太祖文昭皇后廟博士秦靜議
曰靈命瑞圖可祀天皇帝五精之帝於洛陽祀南郊
所祭祭訖奉誥冊文脯醢酒告太祖廟藏冊於石函尚

書奏曰秦靜議當遣兼太尉告祠以武皇帝從五精以上六座餘衆神皆不設牲用如郊祭明帝詔每祀天輒以地配今不地配耶尚書奏孫欽議周禮祀天南郊無地配之文大魏受禪因漢祀天以地配此謂正月南郊常祀也今告靈瑞不須以地配王肅議禮有事於王父則以王母配不降於四時常祀而不配也且夫五精之帝非重於地今奉嘉瑞以告而地獨闕於義未通以地配天於義正宜詔曰祀天以地配此既正義今告瑞祭

於五精之帝則地不得闕也又詔曰告皇天及五精今冊文中都不見五精之帝意何以耶尚書奏冊文侍中韋誕所作文中皇皇后帝即五精之帝昔舜受禪告天云皇皇后帝亦合五精之帝於文少不可分別可更增

五精字奏可

秦靜上告瑞祝文曰孝孫皇帝諱使太尉臣某以靈命瑞圖冊告於天郊事畢將納

冊於石函謹使太常臣某帥有司以脯醢旨酒敢昭告於皇祖武皇帝以武宣后卞氏配尚饗明帝泰

和六年征西大將軍臣懿等言長安典農中郎將張烈書言所部人左先雨後於地得玉印臣今謹遣夏裕送

詔推原符瑞有感而至宜因祭祀奠於文思皇后神座
前以慰神靈之思念散騎常侍高堂隆議按典瑞天子
有事必先告宗廟以象生也凡宗廟祖尊而禰親祭祀告
事皆先尊而後親往者得瑞璽以告宗廟而奠於親廟
此則告於尊奠於親故事明比文皇帝文思皇后其為
慈親一體也告之日質明守官筵於廟堂之奧設玉几
近南設洗於阼階東南酒人設醴酒於堂脯人醢人執
籩脯豆醢於洗北西面公位於阼階西南北面太常位

於阼階北面差出公後百執事叙立於卿後執壘使者
立公西北東面諸博士差退唯籩人豆人不拜餘皆拜
拜訖解劔納履博士引公祝導盥升自阼階博士立於
高皇廟室戶外西東面祝先入室南面公入戶內西面
博士并引卿與從公籩人醢人百執事皆從升博士引
使者升階如在廷之位卿受脯於戶外入於筵前醢人
以醢授卿卿拜興受設於籩北興出俟事於太皇帝室
南面祝酌酒奠籩南祝導公博士引使者執邸受瑞壘

於戶祝西面立於戶外東使者還復位公奠璽於几東
興復位祝入公再拜稽首興立漏移一刻公執璽即授
使者戶外遂造太皇帝武皇帝文皇帝皆如高皇出禮
畢之後可使都督黃門兼諸官告瑞於文思皇后寢堂

如廟之禮

高堂隆入議往者得瑞璽祝文曰於惟往者
坤靈吐耀天球玉璽見於宗廟之宮今則西

嶽之精中明天意重出瑞璽王國之域實為皇天后土明
報皇高曾祖武文之德德祚洋溢光潤萬國孝皇帝諱
謹使上公臣某敢用嘉薦醴酒奉呈瑞璽以告先靈○
尚饗具祝詞唯曰明報聖慈文思皇后之德為異耳

東晉元帝為瑯琊王將即極位告廟王導書問賀循云

或謂宜祭壇拜受天命者或謂直當稱億兆羣臣告四祖之廟而行者若爾當立行廟王今固辭尊號俯順羣情還依魏晉故事然魏晉皆稟命而行不知今進壘當云何循答曰愚謂告四祖之廟而行蜀書劉先主初封漢王時羣臣共奏上勲德承以即位今雖事不正同然

議可方論

導又書曰得刁僕射書曰如此京兆是宣帝祖章郡是父也至惠帝為七廟至懷帝京兆

府君應落想足下亦是識刁侯不欲告惠懷二帝不知於禮云何循答曰古禮及漢氏之初皆帝帝異廟即位大事謁於太祖故晉文朝於武宮漢文謁於高廟也至光武之後惟有祖宗兩廟而已祖宗兩廟昭穆皆共堂

別室魏晉依之亦唯立一廟則一廟之中苟在未毀恐有事之日不得偏有不告然人不詳太廟定議不敢必據欲依古禮唯告宣帝一廟今意以祖宗非一但太廟合共事與古異不得以古禮為斷太常問今

封建諸王為告廟不若告廟冊與告諸王同異祝文同不當以竹冊白簡隸書篆書也博士孫毓議按尚書洛誥王命作冊逸祝冊唯告周公其後謂成王已冠命立周公後作為冊書逸誥以告伯禽也又周公請命於三王乃納冊於金匱中今封建諸王裂土樹藩為冊告廟篆書竹冊執冊以祝訖藏於廟及封王之日又以冊

告所封之王冊文不同前以言告廟祝文當竹冊篆書
以為告廟冊冊之文即祝詞也舊告封王告改年號故
事事訖皆當藏於廟以皆為冊書四時享祀祝文事訖
不藏故但禮稱祝文尺一白簡隸書而已又王珉議云
中朝大事告天地先郊後廟徐邈云天子將出類乎上
帝造乎禰如此次則宜先告郊也按元帝大興元年詔
曰當先告廟出便南郊先人事而後天理自親及尊耶
虞先云武王克商先祭後郊賀循議告謚南郊不當用

牲然先告代祖謚於太廟復有用牲於理不正理不應
有牲告郊廟皆不用牲牲惟施於祭及禱耳徐邈又議
云按武帝永熙元年告謚南郊用牲自江左以來哀帝
興寧中簡文帝咸安中告謚並蒼璧制幣告立太子太

孫

邈與范甯書問告定用牲否禮郊牲在滌三月此謂
常祀耳宗廟告牲亦不展芻豢日既逼不容得備又

禮郊特牲在滌宮而稷牛唯具傳曰帝牛不吉則卜稷
牛而用之如無復九旬之別也謂今牲至則用當無疑
否范甯答云禮郊牲必在滌三月公羊傳養二卜二卜
者謂木卜養二牲也帝牲不吉則卜稷牲稷牲不吉則
不郊蓋所以敬天神而後人鬼也無本郊不滌牲之禮
牲唯具用非吾所聞也凡告用制幣先儒有明義也

孝武帝太元十六年告移廟奠幣祠部郎傅瑗問徐邈
應設奠否邈答曰禮君出境以遷廟主行每舍奠焉凡
事關宗廟非幣則薦未有不告而行將遷主之晨宜依
告以設奠瑗難曰言依告設奠但三薦相去近恐犯春
秋再烝之議禮諸侯薨及禘祫則迎羣主歸太祖廟又
云主出廟入廟必蹕無將行設奠之文奠重於蹕而文
不及無奠明矣禮又云天子諸侯將出必以幣帛皮圭
告於祖禰遂奉以出每舍奠焉而後就舍此謂雖侯王

之貴必有尊也若徵此文事非其喻邈曰禮諸侯出朝
既告祖禰臨行又徧告告不嫌再所引每舍奠者取其
踈數隨宜若然則奠不為數今之告廟戒出期也至日
又告告將出也又曰新故兩廟各有其事左宗人儋曰
有司具請升君升祝奉幣從祝聲三曰孝嗣侯某敢以
嘉幣告於皇考成廟將徙敢告君及祝再拜興祝導君
降於阼階下云至於新廟筵於戶牖間祝奠幣於几東
薦脯醢君盥酌奠於薦西祝聲三曰敢用嘉薦告於皇

考又曰孝嗣侯某潔為明薦尚饗又大戴遷廟禮文云
凡以幣告皆執幣而告告畢乃奠幣於几東小宰升取
幣埋兩階間禮天子諸侯將出以幣告廟遂奉幣以出
及告設奠乃斂幣而藏之兩階此則初告之幣待後告
而藏之必須事訖未訖則未藏今何不陳於新廟耶去
舊之新當即新以藏幣故先奠几東乃取而藏之非謂
舊廟虛告而新廟兼設也且初告告將移祝曰敢以嘉
幣後告告明享祝曰敢用嘉薦尋此二祝之稱則知幣

也薦也各施於一廟矣伏系問宣后徙廟或但告東廟

亦告太廟

宣后簡文帝所生母別在東廟

徐邈答此無禮文意謂初崇

號以告太廟今自一別廟之遷耳於太廟無事無事而告則近黷矣古大事必告初崇進而告是也今徙廟事之末恐不得復告也康帝立准禮將改元尚書下侍御史太常主者殿中屬應告廟其勒禮官并太史擇吉日撰祝文及諸應所用備辦符到奉行博士徐禪議曰按魯文公之書即位也僖公未葬蓋改元之道宜其親告

不以喪闕昔代祖受終亦在諒闇既正其位於天郊必告成命於父祖事莫大於正位禮莫盛於改元傳曰元始也首也善之長也故君道重焉謂應告尚書奏按惠帝起居注改永熙二年為永平元年使持節太尉石鑒

造於太廟前朝明准不應草易如禪議

禪告文曰維建元元年正月日

子孝曾孫嗣皇帝諱謹遣使持節兼太尉某官某甲敢昭告於皇祖高祖宣皇帝諱以眇身屬膺明命為兆人主惟神器之重夙夜祇勵夫首元正位改物承天先王之典型建國之大禮今改咸康八年為建元元年享祖宗之保佑膺乾坤之休靈敢薦告事一元大武鄭合鄭其嘉薦庶羞清滌清酌明告於皇祖高祖宣皇帝穆皇

后張氏尚饗告始祖
廟等十一室同辭也

○梁禮官司馬筠議大事徧告七

廟小事止告一室

時議以封禪南北郊祀明堂巡省四方御臨戎出征皇太子加元服寇賊

平蕩築宮立闕纂戎解嚴合十一條則徧告七廟講武修宗廟明堂臨軒封拜公王四夷欽化貢萬物諸公王以億削封及討封王紹襲合六條則告一室帝從之○大唐儀鳳二年二月二十

九日太常以仲春告祥瑞於太廟高宗令禮官徵求故實太常博士賈大隱對曰古者祭以首時薦用仲月近代相承元日奏祥瑞二月然後告於廟蓋緣告必有薦便於禮也又檢貞觀以來勅令無文禮司因循不知所

起上令依舊行焉

歷代所尚

高陽秦

高辛唐

後漢

虞魏

夏晉

商東晉

周

宋

齊

梁

陳

後魏

北齊

後周

隋

大唐

高陽氏尚赤

以十一月為正

薦玉以赤繒○高辛氏尚黑

以十月為正

以十月為正

為正

薦玉以黑繒○陶唐氏尚白

以十二月為正

薦玉以白繒○

有虞氏尚赤

以十一月為正

夏后氏尚黑

以建寅為正此時物

生色黑禮三正記云正朔三而改文質再而復又書傳略說云天有三統物有三變故正有二生三死王有三

王王有一生一死故元命苞云夏以十三月為正息卦受泰其色尚黑以平明為朔古者易姓而王示不相襲

明受之於天也

大事斂用昏

昏時亦黑此大

戎事乘驪

戎兵也馬黑色

驪牲用玄

玄黑類也

以黑為徽號

崔靈恩云徽謂旌旗也盧植云徽章也號所以書

之於綏若夏則書其號為夏也

朝燕服收冠而黑衣宮室之制屋

詩云夏屋

渠十寸為尺

白虎通曰夏法日數十也日無不照至尺所度無所不極故以十寸為尺 ○殷

人尚白

以建丑月為正物芽色白元命苞曰殷以十二月為正息卦受臨具色尚白以鷄鳴為朔 大

事斂用日中

日中時亦白也

戎事乘翰

翰白馬

牲用白以白為徽

號朝燕服皐冠而縞衣宮室之制屋

韓詩曰殷商屋而夏門也

十二

寸為尺

白虎通云法十二月言歲中無所不成

○周人尚赤

以建子之月為正物萌色

赤元命苞曰周以十一月為正息卦受復其色尚赤以夜半為朔

大事斂用日出

日出時亦

赤戎事乘駮

駮音原馬腹赤

牲用騂

騂赤類

以赤為徽號朝燕

服冕冠而玄衣宮室之制屋

傳曰周夏屋而商門

八寸為尺

白虎通云

周據地而生地者陰以婦人為法婦人大率奄八寸故以八寸為尺王者改正朔本天有三統謂三微之月也

周以十一月殷以十二月夏以十三月也崔靈恩云若以書傳中候文依三正記推之則三皇五帝之所尚可

得而知也以周人代殷用天正而尚赤殷人代夏用地正而尚白夏以人正代舜而尚黑則知虞氏之王當用

天正而尚赤陶唐氏當用地正而尚赤少皞氏當用地正而尚黑炎帝當用天正而尚黑也

尚白黃帝當用人正而尚黑炎帝當用天正而尚赤共工氏當用地正而尚白太皞當用人正而尚黑也○

秦水德漢書律歷志秦自以水德故十月為歲首○漢
火德初亦以十月為歲首及文帝立公孫臣言漢當土
德應黃龍見丞相張蒼以為漢乃水德河決金隄其符
也年始冬十月以外黑內赤

十月陰氣在外故黑陽氣尚伏在內故赤

明年

黃龍果見於成紀帝於是令博士諸生申明土德改歷
及服色事至武帝元封七年用兒寬等議改用夏正以
建寅月為歲首劉向以為赤帝斬蛇之符為火德○後
漢並同前漢○魏土德文帝以建寅月為正服尚黃鵠

以丑牲以白節毛尚赤節幡尚黃郊祀朝會四時之服如漢制宗廟所服如周禮明帝青龍五年三月用博士秦靜等議改為景初元年以建丑月為正孟夏四月制服色尚黃犧牲用白戎事乘黑首之白馬建大赤之旗朝會建大白之旗春秋冬孟仲季月雖與歲不同至於郊祀迎氣祔祀烝嘗巡狩蒐田分至啟閉班宣時令中氣晚早敬授人事諸若此者皆以正歲斗建為節按服色尚黃據土形也犧牲旂旗一用殷禮行殷之時故也

周禮巾車職建大赤以朝大白以即戎此則周以正色之旗以朝以先代之旗即戎魏用殷禮變周之制故建太白以朝大赤即戎也又詔曰今祭皇皇帝天皇皇后地天地郊明堂宗廟皆宜用白其別祭五郊各隨方色祭日月星辰之類用駢社稷山川之屬用玄此則尊卑方色陰陽衆義暢矣三年正月帝崩齊王立以明帝建丑月崩若以其月正朝會設樂不合於禮於是改以建寅之月為歲首

袁准正論曰自非繼亂不宜改正也

○晉金德太始二年

散騎常侍傅玄上議帝王受命應歷禪代則不改正朔
遭變征伐則改之舜正月上日受終於文祖無改正之
文唐虞正朔皆同明矣至殷周革命乃改魏受漢禪亦
已不改至於服色皆從其本唯節幡用黃大晉以金德
王天下順五行三統之序矣詔從之由是正朔服色並

依前代

孫盛晉陽秋論曰孔子修春秋列三統為後王法今仍舊非也晉為金行而服色尚赤考之古

道乖違甚矣

○東晉並同西晉○宋水德亦如魏晉故事○

齊木德餘一依前代○梁火德餘一依前代○陳木德

餘一依前代。○後魏初為土德言繼黃帝之後也故數
用五服尚黃犧牲用白至孝文太和十四年用祕書丞
李彪等議承晉後改為水德祖辰臘申。○北齊木德正
朔服色皆如後魏。○後周承西魏用水德以文帝誕元
氣之祥有黑水之讖故也建寅月為正服色尚黑。○隋
火德以赤雀降祥之故衣服旗幟犧牲尚赤戎服以黃
七月帝始服黃。○大唐土德建寅月為歲首

武太后永
昌元年十

一月一日依周制以建子之月為正改元為載初元年
改十一月為正月十二月為臘月來年正月為一月十

欽定四庫全書

通典
卷五十五

月建亥為年終載初元年九月九日改元天授稱周改皇帝為皇嗣二年正月旗幟尚赤

天寶九載

制應緣隊仗所用絳色幡等並改為赤黃色天下皆然
納崔昌議以土德承漢火行

享司寒

藏冰開冰附○周

宋

隋

大唐

周制凌人掌冰正歲十有二月令斬冰三其凌

正歲季冬火星

中大寒冰藏之時也凌冰室也三其凌三倍其冰備消釋也

春始治鑑

鑑如甌大口以盛冰置食

物於中以禦溫氣春而始治之為二月將獻羔祭而開冰鑑胡暫反甌音直偽反

祭祀供冰鑑

賓客供冰

賓客不以鑑往嫌使停膳羞

大喪供夷槃冰

夷之言尸也尸之槃曰夷

槩
夏頒冰掌事

暑氣盛王以冰頒賜則主為之

秋刷

刷清也鄭衆云刷除冰室當更內新

冰也

月令仲春天子乃獻羔開冰先薦寢廟

謂立春藏冰至春分方溫

故獻羔以祭司寒而後開冰先薦寢廟而後食之

左傳魯大夫申豐曰古者日

在北陸而藏冰

陸道也夏十二月日在虛危冰堅而藏之

西陸朝覲而出之

夏三月日在昴畢蟄蟲出而用冰春分之中奎婁在東方

其藏冰也深山窮谷固陰

沍寒用黑牡秬黍以享司寒於是取而藏之也周

沍閉也必

取積陰之冰所以道達其氣使不為災黑牡黑牲也秬黍黑黍也司寒北方之神故物皆用黑周密也密藏之

其出之也桃弧棘矢以除其災於是以風出而用之

春順

風而散用之

朝之祿位賓食喪祭自命夫命婦至於老疾冰

皆與焉

老致仕在家者

其用之也徧

及老疾也

則冬無憊陽

憊過也謂冬溫

夏無伏陰

謂夏寒也

春無淒風秋無苦雨雷出不震

淒風寒也霖雨

為人害震霆也

無菑霜雹癘疫不降民不夭扎

癘惡氣也短折為夭少死為扎

○宋孝武帝大明六年立凌室藏冰有司奏季冬之月

冰壯之時凌室長率山虞及興隸取冰於深山窮谷固

陰沍寒之處以納於凌陰務令周密無洩其氣先以黑

牡柜黍祭司寒於凌室之北仲春之月春分之日以黑

羔秬黍祭司寒啟冰室先薦寢廟夏祠用鑑盛冰室一
鑑以禦溫氣蠅蚋王御殿及太官饌羞並以鑑供冰自
春分至立秋不限稱數以周喪事繕制夷槃隨冰供給
度室在樂遊苑內置長一人吏一人保舉吏二人○隋
以季冬藏冰仲春開冰並因用黑牡秬黍於冰室祭司
寒神開冰依以桃弧棘矢○大唐制先立春三日因用
黑牡秬黍祭司寒之神於冰室祭訖鑿冰千段方三尺
厚尺五寸而藏之仲春開冰祭如藏禮依以桃弧棘矢

設於冰室戶內之右禮畢遂留之餘具開元禮

禋

周

漢

晉

梁

隋

大唐

周制春官大祝掌六祈其四曰禋人禋門用鬯齋

謂禋

營鄩所祭門國門也齋讀為齊取甘瓠割去祗以齊為罇也魯莊公二十五年秋大水鼓用牲於門左氏以為

用牲非常也凡

祭法云幽禋祭星也雩禋祭水旱也

幽禋

天災有幣無牲

謂星壇也雩禋亦謂水旱壇也春秋左氏傳曰日月星辰之神則雪霜風雨之不時於是乎禋之山川之神則

水旱癘疫之災於是乎禋之

○漢制謂禋為請晴服赤幘朱衣○晉

武帝咸寧及太康中時雨多則禋祭赤幘朱衣閉諸陰

朱絲縈社伐朱鼓焉。○梁制霖雨祈晴亦如雩禮。○隋制霖雨則縈京城諸門三縈不止則祈山川岳鎮海瀆社稷又不止則祈宗廟神州報以太牢州郡縣苦雨亦各縈其城門不止則祈界內山川及社稷報用羊豕。○

大唐因之

縈門不止乃祈山川岳鎮海瀆三日不止祈社稷宗廟並用酒脯國城門用少牢

祈禳

夏

商

周

漢

後漢

魏

晉

宋

夏后氏金行初作葦莢言氣所交也

風俗通曰傳曰萑葦有叢呂氏春秋

曰始得伊尹被之於廟薰以萑葦故用葦者欲人之子孫蕃殖不失其類有如萑葦莢者交易陰陽代興之義

也

○殷人水德以螺首慎其閉塞使如螺也。○周人木

德以桃為梗

梗更也言氣相更也

春官大宗伯以鬴辜祭四方百

物

鄭玄云鬴牲胸也鬴而磔之謂磔據鬴音普逼反

太祝掌六祈以同鬼神祇

一曰類二曰造三曰禴四曰禋五曰攻六曰說

攻說則以辭責

之禴未聞焉天神人鬼地祇不和則六禴作見故以祈禮同之造音七告反禴古外反

國有大故

天災彌祀社稷禱祠

大故兵寇天災疫癘諸祈禱祀之以報

小祝掌小祭

祀將事侯禳禱祠之祝號以祈福祥順豐年逆時雨寧

風旱彌災兵遠罪疾

侯之言候也候嘉慶祈福祥之屬禳攘卻凶咎寧風旱之屬順豐年

而順為之祝辭逆迎祭法曰禳祈於坎壇祭寒暑也禳猶

也彌讀為弭弭安也却也祈求也寒暑不時則或祈或禱之寒於坎暑於壇也○漢制厲殃祀天地日

月星辰四時陰陽之神以師曠配之其壇常祀以禳災兼用三代葦茭桃梗五月五日朱索五色印為門戶飾以儺止惡氣○後漢仲夏之月萬物方盛日夏至陰氣萌作恐物不懋其禮以朱索連葦茭彌牟朴蠱鍾以桃印長六寸方三寸五色書文如法以施門戶○魏祀五郊六宗及厲殃何晏議月令季春礫攘大儺非所以祀

皇天也夫天道不謫不貳其命若之何攘之國有大故
可祈於南郊至於祈禳自宜止於山川百物而已王肅
云厲殃漢之淫祠耳日月有常位五帝有常典師曠自
是樂祖無事於厲殃厲殃同人非禮器雄黃等非禮飾
漢文除祕祝所以稱仁明也陳留范宣曰舜有拂卵無
礫雞及魏明帝大修禳祭儀雞特禳豐之事礫雞豐起
於魏卵本漢制所以輔卵金又宜魏所除也○晉制每
歲朝設葦茨桃梗礫雞於宮及百寺之門以辟惡氣太

始二年有司奏春分祠厲殃及禳祠詔曰不在祀典除之。宋皆省其禮而郡縣往往猶存

高禪

唐

漢

後漢

魏

晉

北齊

隋

大

周制月令仲春玄鳥至之日以太牢祀於高禪

高辛氏之代玄

鳥遺卵娥狄吞之生契後王以為禪官嘉祥而立其祠又月令章句曰高尊也禪祠也吉事先見之象也蓋為人所以祈子孫之祀玄鳥感陽而至其來主於孚乳蕃滋故重其至日因以用事契母簡狄蓋以玄鳥至日有事高禪而生契焉故詩云天命玄鳥降而生商盧植曰玄鳥至而陰陽中萬物生故於是以三牲請子於高禪之神居明顯之處故謂之高因其求子故謂之禪以為古者有媒氏之官因以為神鄭但言后王不知起於何

代天子親往后妃帥九嬪御乃禮天子所御帶以弓韞

授以弓矢於高禩之前

天子所御謂今有娠者禮謂酌飲於高禩之庭帶以弓韞求男

之祥○漢武帝年二十九乃得太子甚喜始立為高禩之

祠於城南祭以特牲

晉博士東哲云漢武帝晚得太子始為立高禩之祠高禩者人之先

也故立石為主祀以太牢也

○後漢因之祀於仲春之月○魏禩壇

有石

青龍中造許慎云山陽人以石為主

○晉以仲春之月高禩祀於城

南祀以特牲惠帝元康六年高禩壇上石中破博士議

禮無高禩置石之文未知設造所由既已毀破可無改

造束哲議以為石在壇上蓋主道也禮祭器弊則埋而置新今宜埋而更造不宜遂廢後得高堂隆故事詔更鐫石令如舊置高禋壇上埋破石入地一丈

按江東太廟北門內

道西有石處如竹葉小屋覆之宋文帝元嘉中修廟所得石陸澄以為晉孝武時郊禋石然則江左亦有此禮矣或曰百姓祀其傍或謂之落星也○北齊置高禋壇於南郊旁廣輪二

十六尺高九尺四陛三壇每歲亥鳥至之日皇帝親帥六宮祀青帝於壇以太皞配而祀高禋之神以祈子其儀青帝北方南向配帝東方西向禋神壇下東陛之南

西向禮用青珪束帛牲共以一太牢皇帝袞冕乘玉輅
皇后褱衣乘重翟皇帝初獻降自東陛皇后亞獻降自
西陛並詣便座夫人終獻上嬪獻於禋神訖帝及后並
詣攢位乃送神皇帝皇后及羣嬪皆拜乃撤就燎禮畢
而還。隋亦以玄鳥至日祀高禋於南郊壇牲用一太
牢。大唐月令亦以仲春玄鳥至之日以太牢祀於高

禋天子親往

月令經文及注
不言有壇廟也

袞褱

周

漢

後漢

晉

東晉

齊

周制春官女巫掌歲時祓除釁浴

歲時祓除如今三月上巳如水上之類釁

浴謂以香薰草藥沐浴之

月令暮春天子始乘舟

蔡邕章句曰陽氣和暖鮪魚時至將

取薦宗廟因乘舟浮川也

○漢高后八月祓於霸上○後漢三月上

巳官民皆潔於東流水上曰洗濯祓除去宿垢疾為大

潔

潔者言陽氣布暢萬物訖出始潔之矣禊者潔也言自潔濯也

○晉公卿以下至於

庶人皆禊洛水之側○東晉元年又詔罷三月弄具海

西公於鍾山立流杯曲水延百僚○齊以三月三日曲

水會古禊祭也今相承為百戲之具雕弄巧飾增損無

常○說曰楔與曲水其義參差晉趙王倫篡位三日會
天泉池誅張林懷帝亦會天泉池賦詩陸機云天泉池
南石溝引御溝水池西積石為楔堂跨水流杯飲酒不
言曲水韓詩曰鄭國之俗三月上巳之日溱洧水之上

招魂續魄秉蘭草祓除不祥

蔡邕曰今三月上巳祓於水濱蓋出此也凡言

祓者社也以為祈介社也一說三月三日清明之節將
修事於水側禱祀以祈豐年也後漢杜篤云郭虞三月
三日上辰產二女上巳日產一女二日產三女並不育

俗以為大忌至此月己日諱止家皆於東流水上為祈禳自潔濯謂之禊祠引流行觴遂成曲水梁劉昭曰郭虞之說良為虛誕假有庶人旬內天其三女何足警彼風俗乎杜篤賦乃稱王侯公主暨於富商用事伊洛帷幔玄黃本傳大將軍梁商亦歌泣於洛禊也馬融梁冀西第云西北戌亥玄石承輸蝦蟆吐寫庚辛之域即曲水之象劉楨魯都賦曰素秋二七天漢指隅人胥被禊國予水嬉此用七月十四日也

諸雜祠

周

秦

漢

東晉

後魏

周立壽星祠於下杜亳

韋昭曰亳音薄湯所都也瓚曰濟陰亳縣是也師古曰杜即京

兆杜縣也此亳非湯都也徐廣云京兆杜縣有亳亭斯近之矣

時奉焉又立杜主祠因

宣王殺右將軍杜伯不以罪後宣王田於圃田杜伯執

弓矢射宣王宣王伏弓而死故周人尊其鬼而歲時奉

祠焉○秦立陳寶祠因文公獲若石於陳倉北阪城祠

之

蘇林曰質如石似肝顏師古曰陳倉之北阪上城中也

其神或歲不至歲或數

來也常以夜光輝若流星光色赤黃長五丈從東方來

集於祠城若雄野雞其聲殷殷云野雞夜鳴

言陳寶若來而有聲

則野雞聞之以應之也

祠以一牢名曰陳寶

臣瓚曰陳倉縣有寶夫人祠或一歲二歲

與葉君合葉君神來時天為之殷殷雷鳴

二世時若陳寶節來一祠春夏用

驛秋冬用驛德公立卜居雍

即今扶風郡雍縣

雍之諸祠自此

興用三百牢於廊

音乎

時作伏祠

孟康曰六月伏日也周時無至此乃有之師古

曰伏者謂陰氣將起迫於殘陽而未得升故為藏伏因名伏日也立秋之後以金代火金畏於火故至庚日必

伏庚者金也

磔狗邑四門以禦蠱災始皇東遊海上祠八神

求仙人其祀莫知起時

八神一曰天主祠天齊天齊洲水居臨淄南郊山下者二曰

地主祠泰山梁父蓋天好陰祠之必於高山之下時命
曰時地貴陽祭之必於澤中圓丘三曰兵主祠蚩尤蚩
尤在東平陸監鄉齊之西境也四曰陰主祠三山三山
即蓬萊方大瀛洲三神山五曰陽主祠之眾山山在東
萊六曰日月主祠之萊山山在東萊長廣皆在西北並勃
海七曰日主祠威山山在東萊不夜縣斗入海寂居齊
東北隅以迎日出八曰四時主祠瑯琊瑯琊在齊東北
蓋歲之所始也皆各用牢具祠而巫祝所損益珪幣雜
異焉音浮○漢高帝天下已定令祝立蚩尤之祠於長安

又置祠祝官女巫巫其梁巫祀天地天社天水房中堂上

之屬晉巫祀五帝東君雲中君巫社巫祠族人炊之屬

師古曰東君日也雲中君謂雲神也巫社巫祠皆古
巫之神也族人炊古主炊母之神也炊謂饔饔也

秦

巫祠杜主巫保族纍之屬

杜主即周之杜伯也巫保族纍二神名纍音力追反

荆

巫祠堂下巫先司命施糜之屬

堂下在堂之下巫先巫之東前者也司命文昌

第四星也施糜具先常施設糜粥者也

九天巫祠九天

師古曰九天者謂中央鈞天東方蒼

天東北炁天北方玄天西北幽天西方浩天西南朱天南方炎天東南陽天也其說見淮南子一說云東方昊天東南陽天南方赤天西南朱天西方成天西北幽天北方玄天東北變天中央鈞天

皆以歲時

祠宮中武帝即位厚禮置祠神君於內中聞其言不見

其人

神君者長陵女子產乳而死見神於妯娌若宛若祠之其室人多往祠平原君往祠其後子孫以尊

顯平原君武帝外祖母也宛若字也妯音軸

又帝師少翁求仙始親祠竈

少翁

言於帝曰祠竈皆可致物物鬼也致物而丹砂可化為黃金

又立粵祠雞卜自此用

持雞而卜如鼠卜也

是時既滅兩粵粵人勇之乃言粵人俗鬼古師

曰勇之粵人名也俗鬼言其土俗尚鬼神之事而其祠皆用鬼數有效昔東甌王敬鬼壽百六十歲後世怠慢故哀托乃命粵巫立粵祝祠安臺無壇亦祠天神祭百鬼宣帝時南郡獲白虎獻其

皮牙爪帝為立祠又方士言隋侯劒寶玉寶璧周康寶

鼎立四祠於未央宮又祠封苑火井於鴻門

西河鴻門有封苑火

井祠火從地中出也

又立歲星辰星太白熒惑南斗祠於長安城

傍又祠三山八神於曲辰

東萊之縣

蓬山石社石鼓於臨朐

又有月祠蚩尤勞谷五床山五帝仙人玉女金馬碧雞
等神遣諫議大夫王褒使持節而求焉。○東晉哀帝欲
於殿前鴻祀

以鴻鴈來為候因而祭之謂之鴻祀
或曰鴻大也鴻鴈初來必將大祀

侍中

劉遵等啟稱此唯出大傳不在六籍劉向鄭玄雖為其
訓自後不同前代以來並無其式。○後魏道武帝初有
兩彗星見劉后使占者占曰祈之則掃定天下后從之
故立其祀又立歲神十二歲一祭以十月用牛一雞三
又立土神四歲二祭常八月十月用羊又立獻明以上

天神四十所歲祭其神尊以馬次以牛小以羊皆女巫行事

淫祠興廢

秦

漢

魏

晉

東晉

宋

後魏

秦德公立卜居雍

即今雍縣也

子孫飲於河遂都雍祠自此

興用三百牢

伏祠已具前

○漢成帝丞相匡衡等奏罷雍廊

上下時及陳寶祀等凡六百八十三所其二百八所應禮及疑無明文可奉祠如故其餘四百七十五所不應禮或復重請皆罷奏奇

本雍舊祠二百三所惟山川諸星十五所為應禮杜主祠有五

置其一高帝所立梁晉秦荆等巫九天南山萊中之屬
及孝文渭陽孝武薄志太一三一黃帝冥羊馬行孝宣
三山并諸山蚩尤等皆罷之也後帝以無繼嗣故復陳寶等祠末年頗

好鬼神故多上書言祭祀方術者皆得待詔谷永說曰
臣聞明於天地之性者不可惑以神怪知萬物之情者
不可罔以非類諸背仁義之正道廣崇無福之祀皆姦
人惑衆是以聖人絕而不言伏惟陛下拒絕無令姦人
有窺朝者帝善之哀帝即位寢疾博徵方士京師諸縣
皆有侍祠使者盡復前代諸神祠凡七百餘所一歲三

萬七千祠平帝末年崇淫祀自天地六宗以下凡千七百所用三牲鳥獸三千餘種不能備乃以雞當鴈鶩犬當麋鹿。○魏武王秉漢政普除淫祀文帝黃初五年詔先王制祀五行名山川澤非此族也不在祀典叔世衰亂崇信巫史至乃宮殿之內戶牖之間無不沃醑甚矣自今敢設非禮之祭巫祝之言皆以執左道論著於令明帝青龍初又詔郡國山川不在祀典勿祀。○晉武帝太始元年詔曰昔帝王循岳瀆山川各有定制然以道

別天下其鬼不傷人故祝史薦而無媿辭而淫祀不作

末世妖孽相煽

音扇

捨正為邪故魏朝疾之宜按禮為制

使妖淫之鬼不亂其間○東晉穆帝升平中何瑾請備五岳祠曰唐虞之制天子五年一巡狩柴燎五岳徧於羣神及秦漢都西京涇渭長水雖不在祀典以近咸陽故盡得比大川立祀自永嘉之亂唯滯之天柱在王畿之內選百戶吏卒以奉其職中興之際未有官守廬江郡遣大夫兼假四時禱賽春釋寒而冬請冰自咸和迄

於今又復隳替計今非典之祠可謂非一考其正名則淫昏之鬼推其糜費則百姓之蠹而山川大神更為簡缺可令禮官作式其諸妖孽可粗依法先去其甚俾邪不瀆正時不行。○宋武帝永初二年普禁淫祀由是蔣子文祠以下皆絕孝建初更修蔣侯祠所在山川漸皆循復明年立九州廟於雞籠山大聚羣臣加蔣侯爵位至相國大都督中外諸軍事加鍾山王蘇侯驃騎大將軍四方諸神咸加爵秩。○後魏初自天地社稷以下合

千七十五所歲用牲七萬五千五百頭孝文帝詔曰朕
承天事神以育羣品而歲秩虔廣用牲甚衆夫神明正
直享德與信何必在牲其令有司非天地宗廟社稷之
祀皆用酒脯太和十四年詔自先朝以來享祀凡千二
百餘處今欲減省務從簡易先常有水火之神四十餘
名及城北星神今圓丘之下既祭風伯雨師司中司命
等明堂祭五祀皆有此四十神悉罷之初每以正月吉
日於庭設幕中置松柏樹設五帝座至孝文詔曰禮云

自外至者無主不立此既無祖配揆之古典實無所取
又探冊之祭可悉罷之

